



Հայկական գիտահետազոտական հանգույց Armenian Research & Academic Repository



Սույն աշխատանքն արտոնագրված է «Ստեղծագործական համայնքներ
ոչ առևտրային իրավասություն 3.0» արտոնագրով

**This work is licensed under a Creative Commons Attribution-NonCommercial
3.0 Unported (CC BY-NC 3.0) license.**

Դու կարող ես.

պատճենել և տարածել նյութը ցանկացած ձևաչափով կամ կրիչով
ձևափոխել կամ օգտագործել առկա նյութը ստեղծելու համար նորը

You are free to:

Share — copy and redistribute the material in any medium or format

Adapt — remix, transform, and build upon the material

17500/20

323.1(47.925)

0-90

ՀԱՅՈՒԹԵԱՆ ՀՈԳԻՆ

ԲԱՆԱԽՕՍՈՒԹԻՒՆ

ԳԵՐԱՊԱՏԻ ՀՕՐԿ

ՄԱՂԱԲԻՈՅ ՎԱՐԴԱՊԵՏԻ ՕՐՄԱՆԵՐ
ՅԱՆՏՈՆԵԱՆ ՄԻԱԲԱՆՈՒԹԵՆԷ

ԱՐՏԱՍԱՆԵԱՂ Ի ԼՍԱՐԱՆԻ ԿՐԹԱՍԻՐԱՅ ԸՆԿԵՐՈՒԹԵԱՆ
ՅԻՒՎԻԻՏԱՐ Ի 26 ՄԱՅԻՍԻ 1879

ԵՒ

ՀՐԱՏԱՐԱԿԵԱՂ ԶԱՆԻԲ
ԿՐԹԱՍԻՐԱՅ ԸՆԿԵՐՈՒԹԵԱՆ

ԿՈՍՏԱՆԳՆՈՒՊՈԼԻՍ
ՏՊԱԳՐՈՒԹԻՒՆ ՊՕՂԱՍԻ ԲԻՐԻՇՅԵԱՆ
ԹԵՐԱ, ՇԵՂԻ ԿՈՐԹՅ ԹԻԻ 5

1879

523.7(01.54)
17-6

ՀԱՅՈՒԹԵԱՆ ՀՈԳԻՆ

323.1 (47.925) —

26 SEP 2006

0-90

uf

ԲԱՆԱԽՕՍՈՒԹԻՒՆ

15 JAN 2010

ԳԵՐԱՊԱՏԻ ՀՕՐԵ

Հ. ՄԱՂԱՔԻԱՅ ՎԱՐԴԱՊԵՏԻ ՕՐՄԱՆԵԱՆ

ՅԱՆՏՈՆԵԱՆ ՄԻԱԲԱՆՈՒԹԵՆԷ

ԱՐՏԱՍԱՆԵԱԼ Ի ԼՍԱՐԱՆԻ ԿՐԹԱՍԻՐԱՑ ԸՆԿԵՐՈՒԹԵԱՆ
ՅԻՒՍԿԻՏԱՐ Ի 26 ՄԱՅԻՍԻ 1879

ԵՒ

ՀՐԱՏԱՐԱԿԵԱԼ ԶԱՆԻԻՔ

ԿՐԹԱՍԻՐԱՑ ԸՆԿԵՐՈՒԹԵԱՆ



ԿՈՍՏԱՆԴՆՈՒՊՈԼԻՍ

ՏՊԱԳՐՈՒԹԻՒՆ Պ. ՔԻՐԻԵՋԵԱՆ

ԲԵՐՈ, ՇԵՆԻ ՓՈՂՈՑ ԹԻԻ 5

1879



4 SEP 2013

17500/20

ԱԶԳԱՅՆՈՅ ՄՏԱՒՈՐԱԿԱՆ ԵՒ ԲԱՐՈՅԱԿԱՆ ԿՐԹՈՒԹԻՒՆ

Խրեան նպատակ ունենալով, Կրթասիրաց Ընկերութիւնս սոյն առաջադրութեան հաւատարիմ արդիւնք մը կը համարի այսօր հրատարակութիւնն այս Բանախօսութեան, զոր արտասանած էր Գեր. Հ. Մաղաքիա Վ. Օրմանեան 'ի ներկայութեան բազմաթիւ ազգայնոց' Ընկերութեանս Սէլամազի Լաարանին մէջ, եւ որոյ տպագրութիւնը թէ ներկայ ունկնդրաց եւ թէ բացակայ բանասիրաց կողմանէ ստէպ խնդրուած ըլլալով հայրենասիրաց այս իղձը լրացունել արժան գատեցաւ :

Ուստի քաղցր է մեզ յուսալ, որ մեր այս ձեռնարկն արժանաւորապէս պիտի վարձատրի բանասիրաց համայն եւ ազգասիրաց ընդունելութեամբը, զոր ստոյգ եմք գտանել այսպիսի ազգօգուտ եւ իմաստալից բանախօսութեան մը մասին :

Իւսկիւտար, Սէլամազ.
'ի 15 Յունիսի 1879



Ի զիմաց Գիւանի Ընդհ. Ժողովոյ
ԱՏԵՆԱՊԵՏ

Handwritten signature



866
42

Տեւորք և Տիրութիւնք .

Երբ կըթասիրաց ընկերութեան Գործադիր Ժողովոյն հրաւերը պատուեց զիս՝ այս երեկոյ բանախօսելու առաջարկութեամբ , ազատ թողուած էր բանախօսութեան նիւթը . այլ բնական հարկ մը կայր իմ վրաս , այն է ազգային նիւթոյ մը վրայ ճառել ազգասիրաց գումարման առջեւ : Սակայն ընդարձակ է ազգային նիւթոց ասպարէզը և հոն ամենայն ոք միշտ նորանոր կետեր կը գտնայ . այսչափ ատենաբանք ազգային նիւթերու վրայ կը խօսին առանց իրարու զրուցածը կրկնելու : Չեր ընկերութեան անունը , Տեւորք , որ այս գրական հանդիսից հաստատութեան և յառաջադիմութեան հետամուտ եղել և է , իմ մտացս գիմացս ելաւ . կըթասէր հրաւիրակքն , կըթասէր ընկերքն , կըթասէր ստուգիւ և ունկնդիրքս , մանաւանդ թէ ըսեմ բովանդակ իսկ բնակիչք երբակի թաղից հնոց Ոսկեքաղաքիս , ուր է Հայութեան կեդրոններէն մին , ոչ թէ թուովն միայն այլ և ըզձիւքն և ջանիւք : Բայց ի՞նչ է զոր կըթել կը սիրէք կըթասէրք , ոչ ասպքէ՞ն Հայն . վասն զի ազգային է հաստատութիւնդ և ազգային նպատակդ :

Այս նպատակին հետեւութիւնն է լաւ ճանչնալ առարկայն զոր կըթել կը սիրէք . իսկ առարկայն զոր պիտի կըթէք՝ մարմին մի է բարոյական , ազգ մը , որ իւր գոյութիւնը գիտէ արտաքին պարագայից յարաբերութեան մէջ . իսկ իւր էութիւնն հողեկան յատկութեանց յարաբերութեանցը վրայ հաստատեալ է : Դուք որ ձեր ազգը , Հայութիւնը , կըթել կը սիրէք , սոյն Հայութեան ինչ ըլլալը պէտք է որ լաւ գիտ-

նայք և խորունկ իմաստասիրէք, ուստի և ինչ ուրիշ նիւթ կրնայք ունենալ ձեր զննութեանց՝ եթէ ոչ Հայութեան Հոգին, որ է ամենայն Հայոց հոգեկան յարաբերութեանց բովանդակութիւնը = Ահա, Ունկնդիրք իմ սիրելիք, ինչ մտածմունքով որոշեցի սոյն նիւթին վրայ ճառել այսօր, կարծելով այսու ոչ թէ իմ ներքին բաղձանացս յաղուրդ միայն տալ, այլ և ճշդիւ այդ Լսարանիս հաստատութեան և նպատակին համապատասխանել, և անոր սահմաններուն մէջ մընալ = Այլ որովհետեւ Հայութեան հոգւոյն վրայ խօսեցն՝ կըրնայ մեզ նաեւ իմաստասիրական և քաղաքագիտական խորհրոց խորերը առաջնորդել՝ գործնական խնդիրները մոռցնելով, կ'ուզեմ այժմէն յայտնապէս զեկուցանել թէ տեսական խնդրոց ասպարէզը օտար է բոլորովին իմ նպատակէս, և պիտի աշխատիմ գործնական և գործադրական խնդրովք զբաղեցուցանել ձեր ունկնդրութիւնը = Անցաւ այն ժամանակը՝ երբ մեծ ինչ կը կարծուէր վերայեալ խնդրովք միտքերը յոգնեցնել և անիմանալի ճշմարտութեանց մեկնութեամբք ճոռումսընենել. այսօր գործոյ ժամանակ է, և աստե՛նաբանքս իսկ այդ հարկին պէտք է հպատակիմք :

Եթէ բարոյական մարմնոյ մը հոգին՝ իւր անհատից ընդհանուր եղած հոգեկան յատկութեանց և յարաբերութեանց բովանդակութիւնն է, ուրեմն Հայութեան ալ հոգին ամեն Հայ անհատի սեփական հոգեկան յատկութեանց, և Հայ անհատներու իրարու հետ յարաբերութեանց բովանդակութիւնն է : Թէպէտ և այդ յատկութիւնք և այդ յարաբերութիւնք մասնաւոր դէպքեր և մասնաւոր գործեր են, բայց անոնցմէ ընդհանուր բարոյական օրէնք մը յառաջ կուգայ, ինչպէս մասնաւոր բնական դէպքերէ և երեւոյթներէ՝ ընդհանուր բնական օրէնք մը կը հետեւեցնեն բնագիտութեան իմաստունները = Այդ օրինաց հետեւելով բնագիտութեան նման բարոյագիտութիւն մը ի լոյս եկած է, և ինչպէս բնագիտութիւնը իւր օրէնքը և իւր իմաստասէրները ունի, ասանկ ալ բարոյագիտութեան օրէնք և իմաստասէրք կան = Բայց բարոյագիտութիւնը առհասարակ մարդկութեան վրայ

կը խօսի, շատ կ'ընդհանրացնէ իւր սկզբունքը՝ զննութիւնքը և օրէնքը, որպէս զի կարենայ ի մի միացնել և լծորդել ամեն մարդիկ, նախաջրհեղեղեանը և այժմեանը, հնաշխարհիկը և նորաշխարհիկը, զարգացեալը և կիսավայրենին, Հրէայն և Հելլէնը, Հայը և ոչ Հայը = Մեք այդչափ ընդհանրութեան պէտք չունիմք. մարդկային սեռին այնչափ ցեղերէն մէկ հատը միայն առարկայ կ'ուզեմք ընել մեր զննութեանց, որ տեսակ մը ազգագիտութիւն կրնայ կազմել, կամ ճիշդ ևս հայագիտութիւն, եթէ գիտնականաց խիղճը կը ներէ այսպիսի զննութեանց գիտութեան անուն տալ : Բայց ինչո՞ւ չներէ, ցորչափ մեր այդ զննութիւնք ալ գործերու վրայ կը հիմնուին, սկզբունքներով կ'իմաստասիրուին և օրէնքներու հաստատութեան կ'առաջնորդեն :

Դէպքերը և գործերը, որք կարծես թէ մեր բարոյական և ազգային մտաւորական աշխարհին երեւոյթներն են, ես բոլորովին իսկ մէկ կողմ կը թողում. յայտնի կ'ենթադրեմ բոլոր իմ ունկնդրացս մեր ազգային պատմութեան յիշատակները, և մեր ներկայ ազգային դրից պարագայները = Ասոնք են մեր գիտութեան հիմունքն :

Եւ որպէս զի ընդվայրապարծ չկարծուիմ՝ շուտով կ'ուզեմ յաւելուլ թէ ո՞չ այս տեղ և այսօր մեք առաջին անգամ այդ հիմանց վրայ հաստատեալ բարոյական իմաստասիրութիւնը պիտի կատարեմք. և ո՞չ թէ մեք անձանօթ գիտութեան մը անձանօթ օրէնքները գաղտնութեան խորերէն ի լոյս պիտի հանեմք. և ոչ իսկ ի լուր աշխարհի անլուր բաներ պիտի խօսիմք = Ամեն Հայ անհատ, որ քիչ շատ իւր ազգին պատմութեան տեղեակ է, որ քիչ շատ իւր աշքին ներքեւ հանդիպած ազգային գործոց վրայ կը խորհրդածէ, մէկէն կ'սկսի անոնց յարաբերութենէն հետեւութիւն մը հանել, և իսկոյն իսկ վճռել թէ Հայն այսպէս կամ այնպէս է, և նոյն ժամուն բերման համեմատ՝ կամ երկնաչափ բարձրացնել զայն և կամ ինչուան անդնդոց խորերը իջեցնել = Այսպիսիներէն շատեր իրենց գաղափարը նաև գրով և հրատարակութեամբ ամենուն ծանօթացնելու աշխատած են :

Այս տեսակ խօսից և գրութեանց վրայ ընդհանուր ակնարկ մը նետելով կը տեսնանք, որ անոնք որ Հայը կը գովեն, աւելի բանաստեղծական արդեանց վրայ կը հիմնեն իրենց խօսքերը . և իրենց մտաց աշխոյժը շարժողը՝ աւելի Եդեմնական գրախօսն է, Մատեաց սարը, Նոյեան աղանին, պայծառ երկինքն, դաշտաց բուրմունք, գիւցաղնական վէպը, Գողթնեան պուէտք, Եփրատայ ամուսնք, Երասխայ յորձանք, և այլ սոյնպիսիք . քանթէ բուն բարոյական արդեանց պարծանք : Մանաւանդ թէ նոքա որ այս վերջին դիտակէտին ներքեւ կը խօսին կամ կը գրեն, սրչափ տարբեր ոճ կը գործածեն, սրչափ վայեր կը կարդան, սրչափ ողբեր . սրչափ ստգտանք . սրչափ ամբաստանութիւնք : Նոր խորենացիներ և լատիվերացիներ, իրենց աղիողորմ հեկեկանօք ամենուն ականջը կը լեցնեն :

Չանազանութիւն մըն ալ դիտած եմ, և կ'ուզեմ զայն ևս ձեզի հաղորդել : Որք Հայուն վրայ կը խօսին, իրենք ալ Հայ ըլլալով, թէպէտ և Հայուն անձնական կարողութեանց և կատարելութեանց ալ պարտուպատշաճ գովեստը ընծայեն, թէպէտ և լիաբերան վկայեն իւր մտաց ընդարձակութիւնը, բնական աշխոյժը, գործունեայ բնաւորութիւնը, մարդասէր վարմունքը, և այլ աղէկ ձիրքերը, մէկէն կը յաւելուն թէ աւանդ որ մերազգիք չեն գիտեր այս գեղեցիկ յատկութիւններէն արժանաւոր արդիւնքն քաղել, և այդչափ երջանկութեան հասնելու կարողութիւն ունենալով հանդերձ՝ գրթբաղդ են իրենց իսկ յանցանքով, ոչ միութիւն ունին, ոչ չափաւորութիւն, ոչ արիւթիւն, ոչ յարատեւութիւն : Ի՞նչ բողբեր, կ'ըսեն, չանցան մերայնոց ձեռքը . ի՞նչ պայծառ ժամանակներ չունեցանք մեք պատմութեանց մէջ . այլ վայ մեզի որ մեք մեր ձեռօք զմեզ կործանեցինք . մասնէ՛նք մեր մէջէն իսկ ելան, անձնասէրք ազգը ընդստնեցին, և անմիաբանութիւնը իրեն ներքին ոյժը փտեցուց : Ասոնց համար Մեհրութան Արծրունին, Վասակ Սիւնին, Վեստ Սարգիսն և նմանիք՝ Հայութեան հրէշներ չեն, վասն զի մասնութիւնը և անմիաբանութիւնը կարծես թէ Հայ հոգւոյն բնական կ'ը-

նեն : Միթէ սովորական իսկ եղած չէ՞ մեր խօսից մէջ կրկնել թէ Հայ ըսել անմիաբան ըսել է . թէ Հայոց մէջ ամենայն ոք առաջին ըլլալ կ'ուզէ, իսկ երկրորդ և ոչ ոք . թէ Հայք ամեն դժուարութենէ կը վհատին . թէ Հայք սկսիլ գիտեն, բայց պահպանել և յառաջ տանիլ չեն գիտեր :

Եթէ այդ ամեն բացատրութիւնք ստոյգ էին, և եթէ իրականութիւնն ալ այդ էր, պէտք էր ուրեմն որ ցաւով սրտի և արտասուալից աչօք խոստովանէինք եթէ Հայութեան հոգին ընտիր բան մը չէ, և բնական ընթացիւք ալ այդ հոգիէն աղէկ բան մը սպասելու չեմք . և որովհետեւ այդ հոգին է որ մեզի պիտի առաջնորդէ, որով պիտի գործեմք, ուստի պիտի օգտիմք, չուզելով իսկ պէտք էր որ գլուխնիս ծռէինք այդ բարոյական հարկին ներքեւ, որ բնական հարկին պէս զօրաւոր է, և, բերանս իսկ առաջ չերթար ըսել, պէտք էր որ ընդունէինք թէ Հայքս աղէկ ապագայ մը չունիմք :

Ստոյգ եմ թէ ձեզմէ ոչ ոք իմ բերնէս այսպիսի խօսքեր ըսել կ'սպասէ . և թէ այս վայրկենիս մէջ շփոթ գաղափարներ ձեր միտքն ալ գրաւած են : Հետեւութիւնը ընդունիլ կը դժկամակիք, և յայտնապէս ըսեմ, թէ կը դժկամակիմ և ես . իսկ նախընթացները ժխտել չէք համարձակիր բոլորովին, վասն զի դուք ալ թերեւս ստէպ ստէպ կրկնած էք այն ստգտանքները, զորս մեծ ինչ ընել կարծելով կը յեղյեղեն շատեր : Իսկ ես ճշդիւ այդ կետը պարզելու համար Հայութեան հոգւոյն վրայ ճառել որոշեցի ձեր առջեւ : Հայութեան հոգւոյն մէկ մասը մեր իւրաքանչիւրին ներսն է, և մեզմէ շատերուն հոգին ինչ կերպ է, այն է Հայոց մեծամասնութեան հոգին, և Հայութեան հոգին ալ Հայոց մեծամասնութեան հոգին է : Կ'զգայք դուք ձեր ներսը այնպիսի հոգի մը ուսկից բոլորովին մերժուած ըլլան միաբանութիւնը, չափաւորութիւնը, արիւթիւնը և յարատեւութիւնը : Ուրեմն եթէ դուք այսպիսի հոգի մը չէք զգար, և կարծեմ թէ այս կետիս մէջ ոչ ոք կ'ելլայ իմ խօսքս ստել, ինչո՞ւ կը փութայք ձեր ազգայնոց ընդհանրութեան հոգին ամբաստանել : Ինչո՞ւ, Հայեր և Հայուհիներ, ինքզինքնիդ իբր բացառութիւն են-

Թաղըրելով, յօժարակամ էք ընդհանրութիւնը մեղադրել:

Եթէ իմ կարծիքս կ'ուզէք լսել, ես պիտի պաշտպանեմ իմ ազգս. իմ կարծեացս համեմատ Հայութեան հոգին անանկ անպիտան չէ ինչպէս ոմանք կը կարծեն. ես աւելի մեծ գաղափար մը ունիմ իմ ազգիս վրայ. և երջանիկ կը սեպէի ինքզինքս եթէ կարենայի իմ կարծիքս ընդհանրացընել, և անոնց որ աւելի խիստ են Հայութեան հոգին դատելուն մէջ թէ ոչ համողողութիւնը, գոնէ բարեմիտ ընդունելութիւնը շարժել:

Հոս ներուի ինձ քանի մը խօսքով զարտուղութիւն մը ընել, ի պատասխանի այն քննադատին որ զիս քիչ ազգասէր գըտաւ երբ ուրիշ լարանի մը մէջ խօսած ատենս Հայոյն անցեալը համեստ գուներով նկարեցի: Այն քննադատը, ո ոք և իցէ, օտարազգի հեղինակաց կարծիքներուն կրկնող մը և Հայոյն անցելոյն վրայ հարեւանցի ակնարկ նետող մը դատեց զիս: Ես լռեցի. վասն զի իմ բերանս չէր կրնար անձիս համար վկայել. սակայն աւելի մեծ պատճառ մըն ալ կայր իմ լռութեանս. ես եղելութեանց վրայ կը խօսէի, իմ քըննադատս կարելիութեամբ ինձ կը պատասխանէր. ես կ'ըսէի թէ չեղաւ, նա կը պատասխանէր թէ կրնար ըլլալ. և այսպէս ճշգիւ խօսելով, նա յաւէտ իմ խօսքս հաստատած կ'ըլլար ի մասին եղելութեան, քան թէ ժխտած: Ապա թէ ոչ ուր կարողութեան և անհատական ձրից խնդիր ըլլայ, կարծեմ թէ պարտուպատշաճ մեծարանաց պարտքս վճարած եմ յիշեալ բանախօսութեանս մէջ, և այս ալ ներքին և խորին համողմանս հետեւութիւնն է, ուստի վարեալ և որով վառեալ սյսօր ալ Հայութեան հոգւոյն վրայ խօսելով, կը համարձակիմ հաստատել թէ ի զուր կ'ամբաստանուի նա իբրեւ զուրկ ի միաբանութենէ, ի չափաւորութենէ, յարիութենէ և ի յարատեւութենէ:

Ի՞նչ ըսեմ ուրեմն գործոց և դիպաց դէմ. վասն զի ես ալ գիտեմ թէ իմ դիմացս պիտի գրուին շատ մը գործեր և և շատ մը դէպքեր, յորս անկեղծաբար խօսելով Հայութիւնը իւր վրայ ո՛չ գովեստ կրնայ հրաւիրել և ո՛չ համակրութիւն:

մանաւանդ ըսեմ, առիթ ալ կուտայ որ իւր վրայ բարդուին այն տգեղ ամբաստանութիւնները զորս ի վեր անդր յիշատակեցի: Գործերը և դէպքերը միշտ ծանօթ կ'ենթադրեմ իմ ունկնդրացս, որով աւելորդ կ'ըլլայ մանրամասնութիւններ յառաջ բերել, որոնք սակաւաթիւ ալ չեն. մանաւանդ Արշակունեաց և Բագրատունեաց ժամանակ, և Պարսից և Հաղարացւոց տիրապետութեան ներքեւ: Ո՞վ չարատուեր կարդալով որ Հայ ձեռքեր Հայոց թագը օտարին կը յանձնեն, և Հայ նախարարք Արտաշիր մը և Գագիկ մը արքունի գահէն իջեցնելով Պարսից և Յունաց ձեռքը գերի կը մտնեն: Ապաքէն եպիսկոպիտ յանցանք և անարդութեան պատճառք. որք և չեն դադրիր երբէք ազտ մը ըլլալ այն ազգին և այն աշխարհին որուն մէջ այդպիսի աններելի ոճիրք գործուեցան: Սակայն կը խնդրէի որ հոս կենար հետեւութիւնը, և ալ աւելի առջև չանցնէր, և ոչ իսկ փաստ մը ըլլար ըսելու. տեսէք Հայութեան հոգին. տեսէք Հայ հոգւոյն արդիւնքն. տեսէք թէ ինչ են Հայերն: Այդ հետեւութիւնն կարի իսկ խիստ է, և գործ մը ինչչափ ալ ծանր ըլլայ չբաւէր ընդհանրութեան մը կերպը և հոգին կազմել: Այս ըսելով կը հիմնեմ խօսքս ազգաց պատմութեան վրայ, և իներկայիս իսկ զանազան ազգաց և պետութեանց մէջ հանդիպած դէպքերուն վրայ:

Գէշ և տգեղ գործեր մեր առջև կը դնէ Հայոց պատմութիւնը, անմիաբանութեան արդիւնք եղող կերպ կերպ արկածներ մեր հայրենեաց վրայ հասան, արդի ժամանակաց մէջ ալ կրնամք զանազան գործեր և պատահմունքներ առջև բերել, որոց վրայ տխրելու և ամհնալու տեղի ունիմք:

Ի՞նչ ուրեմն. միթէ Հայոց պատմութիւնն է միայն որ այդպիսի թուի կետեր կը պարունակէ. միթէ Հայերն են միայն որ այդպիսի յանցանաց պարտաւոր գտնուած են երկրիս վրայ. կամ թէ ներկայ ժամանակաց մէջ ալ Հայերէ զատ ուրիշներ չկան որ հաւասարապէս նոյն տեսակ ամբաստանութեանց կրնան ենթարկուիլ: Պատմութեանց փոքր ի շատէ տեղեակ լինելով, Եւրոպացի ազգաց մէջ փոքր ի շատէ բնակելով և ճա-

նապարհորդելով, և ժամանակակից դիպաց և տեղեկութեանց
 զբաղելով, կրնամ համարձակ խօսիլ և հաստատել թէ գրե-
 թէ պատմութիւն չկայ որ իւր անուան անարգանք առթող
 գործեր չունենայ. պետութիւն չկայ որ զըջալու առիթ ե-
 ղող պատահարներ չողբայ. և հիմակ ալ ամեն տեղ և ամեն
 կողմ հակառակութիւնք կը տիրեն և ընդդիմութիւնք
 կը թագաւորեն: Ամենէն աւելի զօրաւոր և իմաստուն և խո-
 հեմ կարծուած ազգաց մէջ այնպիսի բաժանմունք և հերձ-
 ուածք կը տիրեն, որք ինչուան ազգին և պետութեան հի-
 մանց հաստատութիւնը կը վտանդեն: Աչուրնիս գոց բռնե-
 լով՝ նապարծ կրնամք ըլլալ, վասն զի մեր արդիւնք չափա-
 զանց աղէկ կ'երեւին մեզի. բայց նոյնպէս ալ աչուրնիս գո-
 ցելով ի զուր ամբաստանող կ'ըլլամք, վասն զի թերութիւնք
 չափազանց մեծ կ'սկսին երեւիլ մեր աչքին: Այդ կետին վրայ
 երկար խօսելով բուն նպատակէս կը հեռանամ և երբ Հա-
 յութեան հոգին կ'ուզեմ իմացնել և ըստ կարի պաշտպանել,
 յանկարծ ինքզինքս ընդհանուր պատմութիւնը իմաստասի-
 բելու վրայ կը գտնեմ: Ինչ որ բազդատութեան ոյժը ինձ կը
 թելադրէ, հասարակ պէտք է ըլլայ ևս ձեզ՝ որք զուրկ չէք
 պատմական և լրագրական ծանօթութիւններէ: Որոյ որ
 դայթակղելով կը նային մեր միջնադարեան ժամանակաց ան-
 տեղութեանց վրայ, յիշեցուցէք անգամ մը եւրոպական լա-
 տին և Գերմանացի ազգաց միջին դարերու պատմութիւնը.
 Ինչպէս օտարաց ձեռն տալով սեփական թագաւորութիւն
 նին կը տապալէին. ինչպէս տեսակ տեսակ բռնութեանց ջա-
 տագով կը կանգնէին. ինչպէս ամեն ազգ ի ծուէնս պատա-
 ուեալ հարիւրաւոր և հազարաւոր իշխանութեանց կը բաժ-
 նուէր. ինչպէս համազգի և համարին եղբարք իրերաց ար-
 եամբ սրակեալ ի ինչոյս կը բազմէին. ինչպէս ժողովուրդ-
 բռնաւորաց հաճոյից խաղալիք էր և գերի. ինչպէս ամենէն
 աղնիւ զգացմունք տեղի կ'ուտային մոլի և մոլեռանդն կրից,
 և ամենէն անճուռնի և անպիտան դաղափարներ ուղղութիւն
 և արդարութիւն կը սեպուէին:

Սակայն ևս Հայութեան հոգւոյն ջատագովութեան հա-

մար, ունիմ եւս առաւել զօրաւոր փաստ մը, որուն վրայ
 կը հրաւիրեմ ամենէն աւելի անաչառ քննչաց նկատողու-
 թիւնը: Ազգ մը որ կայ, և կայ ոչ իբր պատմական յիշա-
 աակ, այլ իբրեւ կենդանի և քաղաքական կենօք ճոխացեալ
 ազգ մը, իւր այդ կացութեան համար երկու պատճառաց
 միայն պարտաւոր կրնայ համարուիլ. կամ արտաքին յաջո-
 ղութեանց կամ ներքին յատկութեանց: Արտաքին յաջողու-
 թիւնք են իշխանութիւն, զօրութիւն, տէրութիւն, պաշտ-
 պանութիւն, հարստութիւն. իսկ ներքին յատկութիւնք են
 արիութիւն, յարատեւութիւն, չափաւորութիւն և միաբա-
 նութիւն: Այս երկու ճանրէն ուրիշ միջոց մը գտնալ անհը-
 նար է. կամ գտնուածը այս երկուքին կը վերածուի, և կամ
 այս երկուքին ընկերակցութեամբ կը բաղկանայ:

Այսօր Հայը կայ, և քաղաքական ազդի մը սեփական
 կատարելութիւնները կը ցուցնէ: Այս իրական բան մըն է և
 ստոյգ, ինչպէս եւս ստոյգ է որ արտաքին յաջողութեամբ
 չէ որ մեք կրցած եմք այդ գոյութիւնը պահպանել. որ ինչ-
 չափ ալ ստորին և դժուարին ըլլայ, տակաւին իւր մէջ բա-
 ւական բան մըն է, շատերուն նախանձելի և առ հասարակ
 ամենուն համար յուսացուցիչ: Եթէ արտաքին յաջողու-
 թեամբ չէ, — վասն զի ուր են Հայոց տէրութիւնը, իշխա-
 նութիւնը, զօրութիւնը, պաշտպանութիւնը և հարստու-
 թիւնը, — հարկ անհրաժեշտ է խոստովանիլ թէ Հայոց ներ-
 քին արդիւնքն և արժանիքն են որ զինքը ազատեցին հա-
 մայնաջինջ ձախորդութեանց ուկիանին ալիքներէն, և ա-
 մենածախ թշուառութեանց դազանին ճանկերէն, և այդ-
 ներքին արդիւնք ալ իւր հոգւոյն յատկութիւնք են. և ճշդիւ
 այն յատկութիւնք յորոց զմեզ զուրկ դատեցին և կը դա-
 տեն՝ որք դէպք և օրէնք իրարու կը խառնակեն, և մասնա-
 ւոր գործերէ ընդհանուր հոգւոյն պատկեր մը կ'ուզեն ըս-
 տեղծել: Ուրիշ առթի մէջ ալ Հայոյն անցեալը քննեցի, և
 իւր պատմութեան վրայ իմաստասիրելով հետեւցուցի եթէ
 անհատական կատարելութեանց նշանակ մի է Հայութեան
 պիժմեան դիրքը. և եթէ եմք ինչ որ եմք միայն այդ պատ-

ճառին համար որ իւրաքանչիւր Հայ անհատ լիովին ունեցաւ այն իղձերը և զգացումները եւ ձիրքերը եւ կարողութիւնները՝ որովք իւրաքանչիւր ազգի բնական կեանքը կ'ապահովուի : Ինչ որ այն առթին մէջ այսպիսի շրջաբանութեամբ բացատրել պարտաւորեալ էի, այսօր աւելի համառօտութեամբ կ'անուանեմ զայն Հայութեան հոգին :

Բաւական զննութեանց մէջ մտանք, որով և կրցանք քանի մը նախադասութիւններ հաստատել Հայութեան հոգւոյն կերպարանին և իւր գործոց և իւր արժանեաց վրայ . սակայն դեռ մթին մնաց զանազան ծայրից իրարու համաձայնութեան կերպը և մեկնութիւնը, որպէս զի բնազնին հետախոյզը գանայ իւր մտաց յագուրդը, և անդստին յարմատի անդ ճանչնայ թէ բարի և թէ չար գործոց ծագումը, կատարելութեանց սկզբնապատճառը և թերութեանց շարժառիթը :

Մարդկային ընկերութիւնք առ հասարակ, որով անուամբ և կոչուին, ազգ կամ տէրութիւն կամ եկեղեցի կամ աշխարհ, անհատից գումարումն են . և իւրաքանչիւր ընկերութեան հոգին անհատից մեծամասնութեան հոգւոյն արտաբերան է : Կան անհատք որք հասարակաբար առմամբ անձնական յատկութիւններէ և կատարելութիւններէ զուրկ են, կամ թէ կատարելութիւններէ զուրկ ալ չըլլալով այնպէս աննշանակ բնաւորութեան տէր են, որ գրեթէ կ'ոչնչանան և իբր թէ զգոն երբ անձնական գիրքերնին կամ իրաւունքնին կամ արդիւնքնին ի լոյս հանելու առիթ մը մէջ տեղ կը դըրուի : Իսկ ընդհակառակն կան եւս ընկերութիւնք որոց անհատք առանձնակի առեալք բաւական ձիրքեր և կատարելութիւններ կը յայտնեն, որով իրենք իրենց կը բաւականանան . և որովհետեւ նաեւ անհատաբար յարգ կամ արժէք մը ունին, կը բաղձան, կը ձկտին և կը պահանջեն իսկ որ ընդհանրութեան ընթացից և գործոց մէջ անհատից դերք մը որոշուի և անձնիւր գործունէութեան ասպարէզը չիփակուի : Մասնաւոր որ ընկերութիւնք կամ ընդհանրութիւնք անմիջաբար անհատից միութենէ չեն կազմուիր, հասարակաբար

և ոտորակարգեալ ընկերութեանց միութիւն են, ինչպէս ազգ մը որ ցեղերէ և քաղաքներէ կը բաղկանայ, պետութիւն մը՝ գաւառներէ և նահանգներէ, և եկեղեցին ալ՝ զանազան աստիճանի վիճակներէ և թեմերէ :

Ընկերութեան ամբողջութիւնը սովորութիւն է շրջանակի մը նմանցնել, որոյ կեդրոնն է այն բարձր իշխանութիւնը որ ընկերութիւնը կը միացնէ . սակայն կեդրոնէն զատ ալ շառաւիղներ կան, և ասոնք ալ մասնաւոր և ստորակարգեալ ընկերական մարմնոց կամ մասանց օրինակներն են, որք ի կեդրոն անդ միաւորեալք, սակայն առանձնական դիրք և գործք և ասպարէզ ունենալէ չեն դադրիր : Այդ շրջանակի և կեդրոնի նմանութիւնը այնչափ սովորական եղած է ընկերութեան նկատմամբ, որ նոյն նմանութեան վրայ հիմնելով անուն տրուած է երկու տեսակ վարչութեան կամ մատակարարութեան՝ որովք ընկերութիւնք իւրաքանչիւր իրենց ներքին ընթացից և յարաբերութեանց կանոնները կը կարգադրեն :

Երբ կեդրոն կազմող բարձր իշխանութիւնը կը տարածէ ամենուրեք իւր ազդեցութիւնը և գործունէութիւնը՝ առանց թոյլ տալոյ մասանց և անհատից իրենց սեփական կարողութիւնը և ձիրքը գործածել, մասնաւոր գործունէութեանց առջեւ խրամներ և պատնէշներ կ'ելլան, և ամենայն զօրութիւն կաշկանդեալ կը մնայ, միայն կեդրոնականին թողլով խորհել և գործել և փորձել, այդ վարչութեան ձեւը կեդրոնական կամ կեդրոնացուցիչ կ'ըսուի : Հակառակն է, այսինքն արտակեդրոնական է, երբ թող կը տրուի որ նաեւ մասնաւոր զօրութիւնք կարող ըլլան իրենց գործունէութեան ասպարէզ մը ունենալ : Հարկ չկայ իսկ յաւելու որ այդ մասնաւորաց գործունէութիւնք չեն կրնար կեդրոնականին հակառակ կամ ներհակ ըլլալ, առանց ընկերութեան ամբողջութեան և միութեան վտանգ հասցնելու, և պէտք է որ ամենն ալ կեդրոնին մէջ միանան :

Թէ այդ երկու տեսակ վարչութեանց ո՞րն արդեօք նախադասելի է, երկար վէճերու նիւթ եղած է քաղաքագիտաց

համար . և հաւասարապէս ապացուցմամբ և հաւանականութեամբ երկու կողմերն ալ իրենց կարծիքը պաշտպանել կը կարծեն , և պատմական դէպքերն իրենց իբր փաստ առնելով՝ երկու կարծիքներն ալ անտեղութիւններ և օգուտներ յառաջ կը բերեն . և արդեամբ ալ պատմութիւնը երկու կարծիքներուն ալ թէ ինչպատ և թէ հակառակ փաստեր կրնայ ընձեռել : Ես կ'ըսեմ թէ բնական օրէնք է որ հաւասարաչափ մեծութեամբ մարմին մը աւելի տոկուն է երբ զանազան մասերէ ոլորած և բաղկացած է , քան թէ երբ միաձոյլ և միապողաղ մարմին մը ըլլայ . այդպէս զանազան մանր գաւազանաց խուրձ մը՝ միակտուր փայտի հետ բաղդատեալ , և զանազան երկաթ թելերէ պարան մը՝ միաձոյլ երկաթին հետ բաղդատեալ , տրամագծի հաւասարութիւնը ճիշդ պահելով : Ինչ որ ալ ըլլայ այդ նմանութեան փաստը , որովք արտակերպութեան ոճոյն պաշտպանք իրենց կարծիքը կը պնդեն , ես կարծեմ թէ բուն խնդիրը լուծելու հիմը յարաբերական է . այսինքն թէ պէտք է նայիլ ընկերութեան մը մասանց և անհատից կարողութեանց և ձրից և զգացմանց , այսինքն է հոգւոյն :

Եթէ ունիս այնպիսի իմն ընկերութիւն՝ որոյ անհատը ոչ անհատական կատարելութեամբ հարուստ են , և ոչ անհատական իրաւանց խտտիւ նախանձախնդիր , յարմարցուր անոնց կեդրոնացուցիչ վարչութիւն մը , ոչ միայն այն է անոնց յարմարը և օգտակարը , այլ կրնամ իսկ ըսել թէ այն իսկ է անոնց ուզածը : Խտտիւ կեդրոնականութիւնը այնպիսեաց զօրութիւնը կը կազմէ , և զիրենք միաբանութեան մէջ պահելու կը ծառայէ , մինչ մասնական և անհատական գործունէութիւն և իրաւունք՝ մասերը կը հեռացնեն , անտի անմիաբանութիւն , անտի լքումն , անտի իսկ ամենայն չաքեաց և վնասուց աղբիւր : Այլ երբ ընկերութիւն մը ընդունակ է արտակերպութեան վարչութեան , և մասեր և անհատներ կարող են իրենք իրենց բաւականանալ ի գործ և յարգիւնս , այս առթի մէջ՝ հակառակը վնասուց աղբիւր է . որովհետեւ մասնական ձիրք և կարողութիւնք երբ ինքզինքնին

ճնշեալ և անդործ կը տեսնան , կ'սկսին կեդրոնական լուծին դէմ՝ նշկահել բնական իմն բերմամբ , և կեդրոնին և մասանց հետ միաբանութիւնը կը պակսի . և երբ այս կը պակսի՝ զօրութիւն , արիութիւն և յարատեւութիւն միանգամայն կ'անհետանան :

Մեք շատ բարձրացուցինք Հայերուն անհատական կարողութեանց և յատկութեանց արդիւնքը . գոնէ այս է իմ ներքին համոզուութիւնս , այս է իմ մտացս դատաստանը , որով շատ դժուարին խնդրոց լուծումը կը գտնամ . և կը յաւելում իսկ թէ շատ մտացի ազգայինք քան զիս իմաստունք , այդ կարծեացս իրաւունք կու տան և զայն ընդունելի կը դատեն : Քանի որ այս է իմ քննութեանցս հիմը , ներեցէք որ ձեր առջեւ առանց այլեւս շրջաբանութեանց մտնալու շիտկէ շիտակ ըսեմ՝ թէ այն թերութիւնք զորս հին պատմութիւնք և ժամանակակից յիշատակք Հայութեան վրայ կը գնեն՝ իրենց արդարացուցումը կը գտնան վերը բացատրուած դրութեան մէջ . և Հայոց անմիաբանութիւնք առաւել այն առիթներու մէջ նշանաւոր եղան երբ Հայութեան հոգւոյն ներհակընդդէմ ոճ մը օտարաց դրդմամբ կամ զանազան պարագայից թելադրելովն , և կամ կեդրոնական իշխանութեան գլխոյն սխալանօք կամ կամակորութեամբ Հայաստանի մէջ հաստատելու փորձեր տեսնուեցան : Արչակունի թագաւորաց վերջին ժամանակներուն մէջ , Մարզպաններուն և Ոստիկաններուն վարչութեան ներքեւ , և Բագրատունի թագաւորաց իշխանութեան ատեն , այդպիսի փորձերու օրինակներ պակաս չեն : Իրաւ որ ժամանակակից պատմիչք խորհրդածութեանց շատ հետամուտ չեն , մանաւանդ թէ իւրեանց գրութիւնք պակասաւոր են ի մասին այն պարագայից՝ որոց վրայ պատմութեան փիլիսոփայութիւնը կը հիմնուի . միայն մեզի արտաքին դէպքերը և դժբաղդութիւնները և ձախորդութիւնները կը պատմեն . իսկ իւրաքանչիւր անձին գաղտնի դիտմանց , սկզբանց , նըպատակին , յատկութեանց և նմանօրինակ տեղեկութեանց բաւական մտադրութիւն չեն ըներ . որով և մեզ կարի դը-

ժուարին կ'ըլլայ ըստ արժանւոյն կշռադատել եղելութիւնքն .
 և երբ կ'ուզեմք դժպէի գործ մը քննադատել, չեմք կարող
 ճշդութեամբ գտնալ թէ ի՞նչ էր բուն պատճառը . ի՞նչ էր
 սկզբնական գործը . ի՞նչ էր իւրաքանչիւր անձին դիտումը ,
 և թէ յանցաւորին քով գրգռող մը կայր , կամ թէ յանցա-
 ւորը ի՞նչ սխալ կարծեաց մէջ կը գտնուէր : Քաւ յինէն չար
 գործ մը արդարացուցանել, կամ անմիաբանութեան չա-
 րութիւնը նուազեցնել, և կամ տղեղ յանցանք մը գեղե-
 րեսել : Բայց երբ կը տեսնամ թէ Հայոց և Հայաստանի թե-
 րութեանց պատճառը սխալ գրութիւն մի էր , ինչո՞ւ զայն
 յայտնապէս չգրուցեմ :

Հայրենասիրութիւնը կը պարտաւորէ զմեզ ուղղակի թե-
 րութեանց ալ մանրազնին քննութիւնը ընել, որպէս զի երբ
 կը տեսնամք թէ անոնք հասարակ և գործողէն անկախ պատ-
 ճառ մը ունին , նախ և առաջ սոյն պատճառը բառնամք .
 և թերութիւնք ալ միանգամայն վերցունք :

Ինչպէս կ'ըսէի , պատմագիրք մեզ բաւական ծանօթու-
 թիւններ չեն տար կատարեալ զննութիւն մը կատարելու ,
 և տուածնին ալ շատ երկար ուսումնասիրելոյ պէտք ունին .
 այսու հանդերձ ով որ անկողմնակալ հոգւով և թափանցիկ
 աչօք կը կարդայ մեր ամենէն դժբաղդ դարուց պատմու-
 թիւնները , բնական իմն ազդեցութեամբ ալ կը նկատէ , թէ
 Հայաստան այն դարերուն մէջ ներհակընդդէմ վարչութեան
 ոճերու ալիքներու մէջ կը ծփար , հինը կ'աւրուէր և նոր մը
 չէր հաստատեր , Հայութեան հոգւոյն բերման և զգածմանց
 հակառակ գործեր կը կատարուէին , թագաւորք ազգային
 արժանապատուութեան մոռացողք՝ օտարաց պաշտպանու-
 թեան մէջ կը փնտռէին իրենց զօրութիւնը . և առանց ըս-
 կըղբան մերթ յարեւելք և մերթ յարեւմուտս , մերթ ի քրիս-
 տոնեայն և մերթ յոչ քրիտոնեայն կը դարձնէին իրենց ա-
 կընկալութիւնը . անոր համար ալ նախարարք միաբանու-
 թիւն պահելու անհնարութեան մէջ կը գտնուէին , ցորչափ
 և ոճն կեդրոնական իշխանութեան ինքն իրեն հետ միաբան
 չէր : Նոյն պատմագրաց յառաջ բերած դէպքերուն մէջ

դժուար չէ տեսնալն թէ երբ կեդրոնական վարչութեան ոճն
 այս կամ այն կերպով Հայաստանի մէջ հաստատուել կ'ուզ-
 ուէր , այն ատեն աւելի կը զօրանային ներքին դժտութիւնք ,
 վասն զի Հայութեան հոգին կ'ապստամբէր փորձոյ մը դէմ ,
 զոր բոլորովին չեմ ուզեր դատապարտել , վասն զի կրնայ ըլ-
 լալ որ ժամանակին պարագայք թանձրացեալ և գործա-
 դրական առմամբ այնպիսի փորձ մը կարենան արդարացնել :
 Սակայն չեմ կրնար ալ ընել թէ այն ոճը Հայութեան հոգ-
 ւոյն յարմար չէր : Այդ հոգին , որոյ այժմ ոչ գովեստը կ'ը-
 նեմ և ոչ դարովը , այդ հոգին՝ որ Հայուն և Հայերուն և
 Հայութեան բնական է , ապստամբեցաւ նաեւ օգտակարու-
 թեան լուծէն : Պակաս չեղան և չեն դէպքեր յորս կեդրո-
 նական և կեդրոնացուցիչ հոգւոյ օգուտները ակներեւ էին և
 են , բայց Հայութիւնն նաեւ օգուտէն հրաժարեցաւ , և ի
 սմին կարծես թէ իւր հոգւոյն բնական դրդմանց հպատա-
 կեցաւ : կեդրոնական ոճոյն գործածութիւնը աւելի կարեւոր
 և աւելի օգտակար է դժուարին պարագայից մէջ և նեղու-
 թեանց ժամանակ , որպիսիք Հայոց և Հայաստանի վրայէն
 պակաս չեղեն . նա ինքն Հռոմ՝ հանրապետական կառավա-
 րութեան դադարումը կը վճուէր երբ հայրենիք ի վտանգի
 էին , և դիկտատորին անխտոր և կեդրոնացուցիչ իշխանու-
 թեան ինքզինքը կ'ենթարկէր : Այսպիսի պարագայից մէջ կը
 գտնուէր և Հայաստան . բայց Հայութիւնն դժբաղդադոյն
 ևս էր , վասն զի և ոչ իսկ իւր փրկութեան համար օրինա-
 ւորապէս խորհելու պատեհն ունէր : Կրնամ ընդունիլ թէ
 որք Հայաստանի մէջ կեդրոնացուցիչ ոճոյ պաշտպան եղան ,
 հայրենասէր նպատակ մը կրցան ունենալ . բայց կը խնդրեմ
 որ Հայոց և Հայութեան ամբաստանողներն ալ ընդունին թէ
 բնածին անմիաբանութեան հոգի մը չէր որ Հայը կը մղէր ,
 հապա արտակեդրոնական գրութեան հակամիտութիւնը , և
 սոյն ոճոյն բնական յարումը , որ մինչեւ ցվերջին կետ՝ իւր
 հաստատութեան մէջ անվրդով մնալ կը նկրտէր :

Ճինգ դարէ ի վեր Հայութիւնն զուրկ է քաղաքական դը-
 րութենէ , և խեղճ Հայն վարատական և ցրուեալ , հալա-

ծական և նեղեալ օտար երկնի տակ և օտար երկրի վրայ սկսած է վնասուել հանդստեան ճաշակը : Բաղդը իրեն հետ ոխերիմ թշնամի՝ ունեցաւ տակաւին երբեմն երբեմն , աստ կամ անդ մարդասէր վայրկեաններ , և Հայաստանի սահմաններէն դուրս ալ Հայկայ որդիք ինքնօրէն և ինքնուրոյն վարչութեան հետքեր ունեցան . հոս ազատ քաղաք մը , հոն առանձնաշնորհեալ կեանք մը . հոս ցեղի մը ապահարկութիւնը , հոն գլխաւորի մը արիութիւնը . հոս պատրիարքական իշխանութիւնը . հոն կայսեր մը բարեսրտութիւնը , թէպէտ անկատար , թէպէտ անհաստատ , բայց միշտ տեսակ մը Հայ վարչութեան նշմարանք եղան : Ասոնց ամենն ալ քրննեցէք , և կը տեսնայք որ Հայն իւր հոգւոյն ազդեցութեամբ մղեալ , իրեն համար այնպիսի վարչական ձեւեր և մատակարարութեան ոճեր վնասուեց և պատրաստեց , որոց վրայ նաև ամենէն թեթեւ ակնարկ մը , անմիջապէս կը համոզէ թէ այն ժողովուրդը որ այդ ճանքաներով տպրեցաւ կամ կ'ապրի , չկրնար ընդունակ ըլլալ կեդրոնական ոճոյն :

Գաղտնիք մը յայտնած չեմ ըլլար , և ոչ ալ նոր ճշմարտութիւն մը խօսած , եթէ ըսեմ թէ Օսմանեան հպատակ Հայոց ազգը կամ հասարակութիւնը , որուն Յաղթական Մէհէմէտի կամքն՝ պատրիարքական անուան և արտօնութեանց ներքեւ՝ վարչական ձեւեր և իշխանութիւններ շնորհեց , տարօրինակ դիպաց և աղետալի դործոց պարտական և պատասխանատու գտնուած է անցեալ դարերու մէջ . բայց երբերք խստապահանջ նոյնօրինակութեան , կեդրոնականութեան և մասնաւոր մարմնոց և անհատից անդործունէութեան փորձեր փորձուեցան : Այս կերպ դէպքերուն՝ պատմութիւնը զանազան անուններ տուաւ , զանազան պատճառներ գտաւ , զանազան մեղադրանքներ հնարեց , զանազան յանցաւորներ ցուցուց , և աւելի ևս յառաջելով ոմանք բովանդակ իսկ Հայութիւնը իբր բարւոյ իմիք անբաւական և անցարմար դատապարտեցին : Այլ եթէ այս ամեն մեկնութեանց տեղ Հայութեան հոգւոյն բնիկ յատկութիւնը դնէք , և անոր հակառակ եղած փորձերը և դործերը որոշէք , ալ

868
42

պատմութիւնը ձեղի համար դժուարիմաց պիտի չըլլայ . և Հայութիւնն իւր թերութեամբ և իւր յանցանօք հանդերձ գովելի պիտի երեւնայ ամենուն . և որ իմ մտացս համեմատ առաւել նշանաւոր է և առաւել օգտակար , Հայութեան հոգին պիտի ցուցնէ իւր բարի յատկութիւնները , և անոնց որ Հայութեան բարոյն կ'աշխատին պիտի ցուցնէ՝ թէ որն է նպատակին հասնելու ապահով ճանքան :

Գարեր իրարու յաջորդեցին , այլ Հայութիւնն թաղեալ ի խորս ասիական աշխարհաց , ի մէջ նեղութեանց և տառապանաց , կ'առաջնորդուէր միայն իւր հոգւոյն բնական մղմամբ . և այն ժամանակներուն մէջ ալ դործով կը ցուցնէր ձեւ մը , որոյ անունը ապագայ ժամանակաց մէջ դրուեցաւ բարգաւաճեալն Եւրոպիոյ ճարտարահնար բառադիտութենէն : Հայն ստացաւ յայնժամ տեսականապէս (ինչպէս տրամաբանք կը խօսին) , ինչ որ արդէն ունէր իրականապէս . վասն զի ըստ իս 1860 տարւոյ “ Ազգային Սահմանադրութիւնն Հայոց ” ոչ թէ նորագիւտ ինչ է , կամ Հայ ժողովրդեան վարչական ձեւոյն մէջ հիմնական փոփոխութիւն մը , այլ մասնաւոր Հայութեան հոգւոյն պահանջը , որուն իւր ձգտմամբ և ըզձիւք կը դիմէր , ինչպէս նուրբ օղբ կը ձգտի ի բարձր կամ ինչպէս ծանրը կը դիմէ ի ստոր . և այս այնու իսկ յայտնի է որ յօրէ անտի որ սահմանադրական ձեւը օրինաւորութիւն ստացաւ , և իւր առաջին ժամանակաց անխորձութեանը արդիւնք եղող դժուարութիւնք վերցուեցան , կարծես թէ Հայութեան հոգին իրեն աւելի յարմար կացութիւն մը գըտաւ , և իբր թէ ի բնէ անմիաբանութեան հակամէտն իւր բնածին միութիւնը մերկացաւ , և ինչուան դժուարին դործոց թեւակոխելու կարողութիւն ունեցաւ . և այնպիսի դործոց՝ յորս անմիաբանութիւնն եթէ մերժուի իսկ ինքնին կը սպրդի . և այս այնչափ նախանձելի միութեամբ և միաձայնութեամբ կատարուեցաւ , որ օտարք անգամ մեր վրայ սխրանալով կրցան Հայ ազգութեան վրայ ոչ միայն բարեյոյս լինել , այլ և վստահութեան հիմերը գտնել ի նմա :

Մեր այդպիսի հոգւոյն նշանակ է եւս այն , որ երբ կեդ-



րոնական մեր իշխանութիւնը գրեթէ ոչինչ էր իւր հարկեցուցիչ միջոցաց անբաւականութեան համար, և նոյն իշխանութիւնն կեդրոնական՝ գործադրութեան միջոցներէ իսկ զրկուած էր, Հայութեան հոգին՝ որ մասնաւոր և անհատական կարողութեանց և գործունէութեանց լրումն է, դիտցաւ այնպիսի միջոցներ ստեղծել այն այս մասնաւոր և անհատական զօրութեանց ձեռօք, որ ազգս կրցաւ իսկ մրցիլ ի մասին յառաջագիմութեան այն ազգաց հետ՝ որք իրենց ձեռքնտու ունեցան զօրաւոր իշխանութիւններ և բարձր հովանաւորութիւններ: Միաբանութիւնք և ընկերութիւնք, գաւառք և թաղք, ինչ որ են, ինչ որ գործեցին, և ինչ որ կը գործեն, անստելի կերպով խօսքերս կը հաւաստեն:

Բանախօսի մը սահմանեալ ժամանակի միջոցը շատ ընդարձակ մեկնութեանց մտնալու չներեր, մանաւանդ երբ լայնածաւալ նիւթ մը բացատրելու պարտքը ստանձնած է. այս պատճառաւ ինչ որ ցարդ ակնարկեցի Հայութեան հոգւոյն գործոց և հակմանց, կատարելութեանց և թերութեանց վրայ, թող բաւական ըլլան մեզի, անոնցմէ ընդհանուր հետեւութիւն մը քաղելու և իբր ի հայելոյ յայտնելու անոր կերպարանը և ըսելու թէ “Սհա Հայութեան հոգին” = Ս.Ս. որովհետեւ այդ հոգին է որ ինքն պիտի կրթուի և Հայ ազգութիւնը պիտի կրթէ, պէտք է եւս որ այդ նպատակին հասնելու յարմար միջոցներ ցոյց տրուին, և Հայ սիրտերու սնտոսի վախերը փարատելով, ամենուն սրտին մէջ քաջալերութիւն մը ազդուի՝ թէ Հայութեան հոգին ընտիր է. գոնէ այնչափ ընտիր, որ ամեն կերպ յառաջագիմութեանց և ամենեցուն ակնկալութեանց համապատասխանելու ընդունակութիւնը լիովին ունի:

Ս.Ս. մինչչեւ այդ բացատրութեանց սկսեալ, սակաւիկ մի խօսքս ընդհատելու համար ձեր բարեհաճութիւնը կը խընդրեմ:

Ազգի մը հոգին կատարեալ կերպով ներկայացնելու համար գիտեմ թէ չբաւեր ցուցնել թէ նա ի բնէ անմիաբանութեան հակամէտ չէ. կամ թէ բացատրել միայն թէ ինչ որ ոմանց համար անմիաբանութիւն կ'երեւայ, ճշդիւ և արդեամբ այս կամ այն զգացման արդիւնքն կամ մոլութիւնն է: Անոր համար ես ինքնին կը խոստովանիմ թէ Հայութեան հոգին ձեզի յայտնած և իմացուցած չեմ ըլլար բանախօսութեանս առաջին մասովը՝ ուր գրեթէ սոսկ յիշեալ կետին վրայ պնդեցի: Սակայն կարծեմ թէ դուք ալ դիւրաւ իմացայք թէ իմ դիմացս գլխաւորաբար գրծուարութիւն մը կայր, և եթէ կանխաւ զայն լուծել չաշխատէի, կարծես թէ ամենուն սրտին մէջ գաղտնի խղճի խայթ մը թողուցած պիտի ըլլայի, և ամեն խօսքերս հարստահարիչ երկբայութեան առջեւ պիտի ցնդէին: Ապա թէ ոչ շատ դիւրին գործ է Հայութեան հոգին բացատրել, մէջ տեղ դնելով այն գլխաւոր յատկութիւնները որք ընտիր հոգւոյ վիճակեալ ազգաց հասարակ են, և քանի մը համառօտ մեկնութեամբ հաստատել թէ ինչպէս այն ամեն յատկութիւնները մեր ազգին մէջ ալ կը գտնուին, և Հայութեան հոգին կը զարդարեն:

Հայութեան հոգին ունի բնական արթնութիւն մը, աշխոյժ բնաւորութիւն, մտաց սրութիւն, որ և իցէ առթի մէջ ինքզինքը չկորսնցնել, և ամենէն մեծ վտանգի մէջ կարող լինիլ պաղ արեամբ և լուրջ տեսութեամբ ելից դարմանը գտնալ և անոր գործադրութեան փութալ:

Հայութեան հոգին ունի սրտի արիւթիւն՝ որով երբէք ինքզինքը ընկճեալ չկարծեր բաղդին բռնաւորութենէն և թշնամութենէն, և թէպէտև դժբաղդութիւնք երկնաչափ բարձրանան և ինքն անոնց ծանրութեան տակ հեծէ, սակայն այսու իսկ իր յոյսը և փոյթը չկորսնցնէր:

Հայութեան հոգին ունի աննկուն յարատեւութիւն որով կը պահպանէ իւր ազգութիւնը և կրօնքը, լեզուն և սովորութիւնը, միայն իւր կամաց և մտաց անդրդուութեանը

866

վտահապեալ, երբ ամեն կողմէն չըսեմ՝ յորդորեալ՝ այլ դող ստիպեալ իսկ է անոնցմէ բաժնուիլ:

Հայութեան հոգին ունի բարուց չափաւորութիւնը որով գիտէ առթից համեմատ վարուիլ, և իւր յաջողութեամբ չզեղծանիլ, ինքզինքը մոռնալով բերմանց և կրից գերի և խաղալիք չըլլալ. այլ ամեն պարագայից մէջ պահպանել իւր միակերպութիւնը, և արտաքին և բաղդի միջոցաց դործածութիւնն ալ կանոնաւորութեամբ մը կարգադրել:

Հայութեան հոգին ունի այն միաբանութիւնը որով ազգային անհատք իրարու միանալով կրնան ընդհանուր բարին և ընդհանրութեան աւանդ եղող բարիքը պահպանել, պաշտպանել, յառաջացնել և կատարելագործել:

Ահա ուրեմն Հայութեան հոգին. Հայութիւնն ունի ուրեմն ազգութեան հոգին, վասն զի ունի պահանջեալ պայմանները: Մի ըսէք՝ թէ ինչ որ ես կը հաստատեմ թէ ունի, յաճախ փորձառութեամբ թերի կը գտնաք, և սոէպ իսկ այնչափ թերի որ աւելի բնական կ'երեւի հետեւցնել թէ չունի: Մի ըսէք, կ'աղաչեմ, վասն զի անիրաւած կ'ըլլաք դուք ձեր ազգին, և ձեր նախանձայութիւնը չարդարանար իրականութեան առջեւ: Ազգութեան հոգին, ոչ միշտ առաքինութիւն է մարդուն համար, այլ սոէպ իսկ շահախընդրութիւն. գոնէ երկրայական է իմ մտացս դատաստանը երբ կը տեսնեմ թէ ազգութեան հոգին համանիչ և համանուն կ'ըլլայ պաշտպանութեան և օգնութեան, փառաց և պարծանաց, շահու և անձնդիւրութեան: Երբ ունի ոք ազգ մը զօրաւոր և փառաւոր, հարուստ և ազդու, ո՞հ, ի՞նչ դիւրին բան է այդ ազգութեան հոգին ունենալ, ինչպէս դիւրին է դոյզն գումար մը նպատից և ողորմութեանց նըւիրել՝ երբ ոք բիւրաւոր ոսկիներու տէր ըլլայ: Այլ ճշմարիտ ազգասիրութիւնը կամ ազգութեան հոգին, այն ատեն աւելի առաքինական է, չըսեմ թէ դիւցազնական իսկ, երբ ոք իւր ազգութեանն ոչ թէ պաշտպանութիւն՝ այլ հարստահարութիւն, ոչ թէ օգուտ՝ այլ վնաս, ոչ թէ դիւրութիւն՝ այլ վստանգ, ոչ թէ փառք՝ այլ անարգանք յաւետ իւր վը-

րայ հրաւիրելու տեսակեալի ներքեւ կը դործէ: Հայքս, թող ամեն աշխարհ այս պարծանքը մեղի ներէ, Հայքս ազգերնիս սիրեցինք և կը սիրեմք, և կենդանի է Տէր, որ պիտի սիրեմք, թէպէտեւ այդ սէրը մեզի նեղութեանց դուռ մի ըլլայ և ոչ այլ ինչ:

Հայուն ազգասիրութիւնը յայտնուեցաւ միշտ անցեալ դարերու մէջ անդրդուելի հաւատարմութեամբ մը. թէպէտ բնական ընթացք իրաց այնպէս կը բերէին որ առանց այս ազգային հոգւոյն, այսօր Հայ մը իսկ մնացած ըլլալու չէր. և եթէ ոք մնացած ըլլար՝ Հայութեան անունն իսկ բերանը առնել պէտք էր որ չուզեր, առանց մէկ գերաստիճան առաքինութեան: Որովհետեւ բնաւ շահու կամ դիւրութեան երեւոյթ մը չէր յորդորել զինքը, — և եթէ կը ներուի ինձ այսպէս ինքզինքս բացատրել, — երբ ուրիշ շատ մը ազգաց ազգասիրութիւնը, ազգային երախտագիտութիւն կրնայ անուանիլ, Հայոց ազգասիրութիւնը պէտք է ազգային մարտիրոսութիւն անուանել:

Երբ այդ սկզբան վրայ հիմնեմք մեր դատաստանները, ո՞հ ինչչափ աւելի արդար և զիջող և բարեմիտ կը պարտաւորիմք ըլլալ մեր ազգին թերութեանց ի մասին ազգասիրութեան, որովհետեւ ըսել թէ Հայերն ազգութեան հոգին կատարեալ ունին, չենթադրել ամենեւին որ ըսուի ևս թէ Հայերն ազգութեան հոգւոյն և ազգասիրութեան դործոց մէջ թերութիւն չունին: Այս ունին, և բաղձալի է որ այդ թերութիւնք ալ վերնան, որով մեր ապագայն աւելի յուսալից գիւրք մը ստանայ. և բաց աստի՛ ալ տեղի չտրուի այն շփոթից որուն մէջ շատեր կ'իյնան, և Հայուն սեփական թերութիւնները և Հայուն կամքէն անկախ չարութիւնները ի մի խառնելով, բոլոր իւր դժբաղդ դրից պատասխանատու՝ նոյն ինքն Հայը կ'ենթադրեն:

Ազգայնոց և Ազգասիրաց առջեւ կը խօսիմ, կը համարձակիմ եւս ասել թէ առաջի ազգագիտաց, որոց համար դաղտնիք չեն Հայոց և Հայաստանի դէպքերը և անոնց շարայարութիւնը: Քանի՞ դար է որ ձախորդութիւնը կը հալա-

ծէ Հայկոյ որդիքը : Ես կարծեմ թէ ճշմարտախօս ըլլալ ուզելով պէտք է ելլամք այն ժամանակները երբ կրակապաշտութիւնը քրիստոնէութեան, Սասանեանը Արշակունւոյն, և Պարսիկը ոչ Պարսիկն դէմ անողոքելի հակառակութիւն մը զգաց, և այս երկու կողմանց մէջ անհաշտ պատերազմներ գրգռուեցան : Հայաստան հազիւ թէ ամենամեծ փոխութեան մը ենթարկուած՝ յեղափոխութեանց կից եղող արևկարութիւնը կը կրէր . զօրաւոր դրացիք այդ երկրին տէրութեան համար կը կռուէին . և միտքեր ալ յուզման մէջ մնացած՝ տեսակ տեսակ խնդիրներէ և շահերէ՝ իբր թէ ամենհի ալիքներէ կը կոծուէին : Այն օրէն ի վեր կրնամ ըսել թէ Հայաստան աղէկ օր մը չտեսաւ, և հողի առնուց կամ կաղդուերելոյ վայրկեան մը չունեցաւ : Արեւելքէն Պարսիկք, արեւմուտքէն Յոյնք, Հաղարացիք հարաւէն և Սկիւթացիք հիւսիսէն, տասնըչորս դարէ ի վեր շարունակ կը հարուածեն այդ տարաբաղդ ազգը և դժբաղդ երկիրը, որ հզօրաց մէջ տեղը մնացած և անոնց կրից թատրոն ըլլալու դժպէհի բաղդն ունեցաւ : Հայն այդ կռիւններուն մէջ ոչ միշտ ուղղակի հարուածոց նպատակն էր, թէև անոնց հպատակ . հզօրք իրերաց ձեռքէն կ'ուզէին զայն թափել . և իբր երկրորդական ինչ՝ զօրաւոր դրացւոց բաղդին կապուած էր Հայաստանի բաղդն ալ : Այդ ծովացեալ դժբաղդութեանց ովկիանին մէջ, աստ և անդ սեպայեալ ժայռեր փրփրադէզ ալեաց դէմ մաքառելով Հայութեան դրօշը կրեցին իրենց վրայ, և փառօք կրեցին : Մամիկոնեանք, Բագրատունիք, Արծրունիք, Ռուբինեանք, Ուրբելեանք, Դաւիթ և Միթիթար Սիւնիք, և մինչև ցլերջին ժամանակս քաջարի զաւակքն Ռւնիոյ, կրցան սպարապետութիւններ, իշխանութիւններ, թագաւորութիւններ, և ինքնօրէնութիւններ հաստատել և պաշտպանել մասնաւոր դաւառաց մէջ կամ ապահով լերանց վրայ : Ասոնք թէպէտև Հայութեան բաղդն հիմնապէս չկրցան բարուքել, սակայն մեծ արգասիք ունեցան անոր գոյութեան և պահպանութեան օգնելով, և այնպէս որ անոնցմէ իւրաքանչիւրն թէպէտև իբր ամենայն Հա-

յոց իշխանութիւն և ազատութիւն չկարենայ յառաջ բերուիլ, բայց և առանձնակի առեալ իբր կանոնաւոր՝ բարեկարգ՝ աշխարհաշէն և զօրաւոր իշխանութիւն մը կրնան յիշատակուիլ, գոնէ գլխաւորները : Իսկ ես ուրիշ նպատակ մը ունիմ այս յիշատակները յառաջ բերելու մէջ . կ'ուզեմ հետեւցնել, որ եթէ Հայերը այնչափ թշուառութեանց և դժուարութեանց մէջ այդպիսի գործեր կատարելու և այդպիսի արդիւնքներ յերեւան հանելու կարող եղեն, ուրեմն կատարեալ ազգային հողի, ճշմարիտ ազգասիրութիւն, և իրական միաբանասիրութիւն ունեցան . որովք միայն այդ գործերն կը կատարուին : Ի զուրէ պնդել թէ աւելին կրնային ընել եթէ ուզած ըլլային . կամ ինչպէս շատերը կ'ըսեն, եթէ միաբանութիւն ունենային : Վասն զի որոնք որ այդ աստիճան հաստատութիւն և յաջողութիւն ցուցուցին, նոքին աւելի լաւ դատաւոր են՝ քան թէ այժմեան քննիչները . և եթէ կրնային՝ ոչ ապաքէն ըրած ալ կ'ըլլային : Միւս կողմէն մի մոռնալք Հայաստանի վիճակը այն դարերուն մէջ, երբ յիշեալ մասնական Հայ իշխանութիւնք հիմնեցան Մեծ և Փոքր Հայոց, և նաև անոնցմէ դուրս եղող երկիրներուն զանազան կողմերը : Այս ընդհանուր առջեւը ըլլայ սեպացեալ ժայռին օրինակը որ համաատարած ովկիանին ալիքներէն կը ծեծուի, կը դիմանայ, և չխորտակիր . միթէ՞ օրէն է ըսել թէ ինչո՞ւ գեղեցկատեսիլ ծաղիկներով զարդարուած չէ . կամ թէ անոր վրայ մանր ծառեր, կանանչ թուփեր, փոքրիկ արօտներ միայն տեսնալով, կրնամ ըսել թէ ինչո՞ւ բարձրուղէյ ծառեր, գեղասաղարթ անտառներ և ընդարձակ մարգագետիններ չպարունակեր : Միթէ՞ զարմանալու չեմք անոր հաստատութեան և մասանց իրարու հետ ամրապինդ միութեան վրայ, որով միայն անկործան մնացած է և կը մնայ :

Ուստի արդարադատ քննիչը պիտի զատէ այն՝ որ Հայութեան հողւոյն պատասխանատուութենէ անկախ թերութիւն է, ինչպէս որ ես ալ կ'ուզեմ ընել . և ցուցնելէն ետքը՝ թէ ինչպէս Հայութեան հողին ընդհանրապէս առեալ

այնչափ ընտիր յատկութեամբ զարդարեալ է և այնչափ գո-
վելի է որչափ և ուրիշ ազգաց հոգիք, և բացատրելէն ետ-
քը՝ թէ շատ մը թերութիւնք որք Հայ ազգութեան վրայ կը
դրուին, իրեն պատասխանատուութեան ներքեւ չեն իյնար,
պէտք է որ աւելի առաջ անցնիմ, և ինչ որ մեր թերու-
թիւններ են անոնք ալ մէջ տեղ դնեմ: Թերութիւն կ'ըսեմ
ոչ թէ բարոյական իմաստով միայն՝ որ է յանցանք, այլ
նաև բնական իմաստով՝ որ է պակասութիւն:

Գժուարին գործ ապաքէն, գալ և ի հրապարակի քարոզել
թէ Հայութեան հոգին կամ Հայ ազգութիւնը այս կամ այն
պակասութիւնները ունի: Ոչ թէ միայն եղբայրսիրութիւնն
է լոկ՝ որ թերութիւնները ծածկել և քօղարկել կը յորդորէ,
այլ նաև անձնասիրութիւնը, վասն զի որով որ ընդհանրու-
թեան մեղադրանք պիտի խօսիմ, նովին և զանձն իմ և զիմ
սըն պիտի դատապարտեմ: Իրաւ է որ երբեմն այսպիսի կը-
ծու պաշտօններ ալ յանձն պիտի առնուն անոնք որ ուսու-
ցանելու և վարդապետելու և ատենաբանելու պաշտօնը վը-
րանին կ'առնուն, և ես իսկ խուսափել չեմ ուզեր այդ դա-
ռըն և զկծեցուցիչ պարտքէն. այլ միայն կերպարանը փո-
փոխելով, փոխանակ դատախազի և ամբաստանի ձև առնելու,
կ'ուզէի որ բարեկամի եղանակաւ քննեմք թէ ինչ ընել հարկ
է մեզ ներկայ պարագայից մէջ, որ Հայութեան հոգին իւր
բարձր սկզբան և աւելի բարձր նպատակին համեմատ գործե-
լով՝ մխիթարական և օգտակար արդիւնքներ յառաջ բերէ:

Սերման և բողբոջի և մշակութեան և պտղաբերութեան
օրինակը ինչչափ ալ շատ սովորական եղած ըլլայ, նորէն
կրկնելը միշտ աւելորդ չէ: Սղէկ պտուղ ընդունելու համար
աղէկ սերմ ունենալ բաւական չէ, աղէկ ալ մշակելու և
խնամելու է, ապա թէ ոչ նաև ամենէն ընտիր հունտը վը-
տիտ և տկար, որդնոտ և փտած պտուղներ կու տայ՝ եթէ
կարեւոր խնամք եղած չէ: Հայութեան հոգւոյն ալ երբեմն
երբեմն ընտիր պտուղներ չտալուն ասկէց զատ պատճառ-
փնտուելու հարկ չունիմք: Ինչչափ պատմութիւնը կրկտեմք
ոչ թէ մերինը միայն, հապա ընդհանրապէս ամեն ազգաց

պատմութիւնները, նոյնչափ կը համոզուիմք եթէ ան-
կիրթ ժամանակներու մէջ աւելի վլասակար գործեր կա-
տարուեցան, և մի և նոյն ազգութիւնն և հոգին զանազան
դարուց մէջ ստացած կրթութեան համեմատ զանազան գոր-
ծեր ալ ցուցուց, երբեմն բարի և երբեմն չար, երբեմն գո-
վելի և երբեմն դսրովելի: Աւելի զգալի եղաւ այդ կետը
մեր ազգին մէջ, որ՝ ոչ թէ միայն առաւել կամ նը-
ւազ կրթութեան ատեններ ունեցաւ, հապա և կերպ կերպ
կրթութեանց ազդեցութիւնն ալ զգաց՝ Հայաստանի
տեսարց կրթութեան աստիճանին և անոնց ընկերական հոգ-
ւոյն կերպին համեմատ: Սնդատին այն ժամանակէն որ մեր
պատմութիւնը ճշմարտութեան վրայ հիմնեալ կը ներ-
կայանայ մեզ, Հայաստանի տիրապետողաց փոփոխութիւնը՝
զգալի կ'ըլլայ նոյն իսկ Հայ ազգութեան հոգիէն, և պատ-
մութեան քննադատ իմաստասէրները կարծես թէ շօշափե-
լով կ'զգան Պարթեւական և Պարսկական, Յունական և Ս-
րաբական, Քրիստոնէական և Մահմէտական իշխանութեանց
իրարու յաջորդելը: Հայը չկրցաւ չզգալ իւր տիրապետաց
հոգին. վասն զի երբ ասոնք քիչ մը հինցան՝ սկսան նաեւ
լուծին հետ հոգին ընտելացնել իրենց հպատակներուն, և
Հայութեան հոգւոյն վրայ իրենց սեփական թերութեանց
զգածմունքները պատուաստել: Բնական էր որ այդպիսի պատ-
ուաստք և նորութիւնք հաւասարապէս ամեն անհատից վը-
րայ չներգործեն, և անկէց հակառակութիւնք ալ ծնանին.
բայց աւելի չարն այն էր որ Հայաստան իւր բաղդին տարօ-
րինակ և կոյր հարուածներով՝ և ոչ իսկ կատարեալ միոյ
միայնոյ տիրոջ ձեռք ինկաւ, այլ ներհակընդդէմ զօրու-
թեանց մէջ տարուբերելով՝ մէկ կէտը այս՝ և միւս կէտը այն
տէրութեան կամ ազգի ծառայութեան ներքեւ ինկաւ, և
անոր ազդեցութեանց ենթարկուեցաւ: Այսպէս կը տեսնամք
թէ դարու մը մէջ Պարսիկք և Հոռոմք, միւս դարուն մէջ
Հագարացիք և Բիւզանդացիք, ուրիշ դարու մը մէջ ալ
Թաթարք և Փրանկք, և յաջորդ դարերու մէջ եւս ուրիշ
ազգեր, բաժնեցին և անջատեցին՝ ոչ միայն Հայոց երկիրը այլ

և Հայոց հոգին , և տարբեր շահերու նկատողութեամբ տարբեր կարծիքներ յարուցին մեր մէջ : Ի՞նչ զարմանք ուրեմն եթէ և ազգային միաբանութիւնն միանգամայն բաժնուեցաւ , երբ զանազան տէրութիւններէ և զանազան ազդեցութիւններէ զանազան կրթութիւններ սկսանք ստանալ :

Այսօր Հայութեան հոգին բարգաւաճելու առաջին միջոցն՝ զայն հաւասարապէս կրթելն է , հաւասարապէս կ'ըսեմ՝ թէ չարիուն և թէ կերպին նկատմամբ : Իսկ հոգին կը կրթեմք նախ մանկական հասակին մէջ , երբ դեռ ափթիթ է և ամեն կերպ ազդեցութեանց ընդունակ . բայց կը կրթեմք նաեւ ապագայ տարիներուն մէջ , երբ Հայն յարուեստ հասեալ է . և այն ատեն կը գործածեմք լուսաբանութեանց , հրատարակութեանց , քարոզութեանց , ժողովոց , ընկերութեանց , գործառնութեանց , և այլ նմանօրինակ միջոցներ . և ինչչափ ասոնք տարածուին՝ այնչափ աւելի կրթութիւնն իւր ազդեցութիւնը կը տարածէ և Հայութեան հոգին ալ ոյժ և համարձակութիւն կ'ստանայ : Իսկ մանկական հասակին կրթութեան , այսինքն է դաստիարակութեան վրայ դալով , այս նիւթը հոս չեմ ուզեր երկարել , ոչ թէ նուազ կարեւորութեանը համար , հապա գլխաւորաբար նիւթոյն ընդարձակութեան համար՝ որ ինքնիրեն բանախօսութեան մը կամ թէ բազում բանախօսութեանց ալ նիւթ կրնայ ընծայել , և հոս հարեւանցի խօսիլն՝ յարգը նուազել է և ոչ թէ առաւելու : Միւս կողմէն ալ ազգն արդէն այդ կետին նըկատմամբ բաւական արթնցաւ , և թէ իշխանութիւնք և թէ ընկերութիւնք այդ նպատակին միայն իրենց փոյթը դարձուցած կը խօսին և կը գրեն , կ'աշխատին և կը հաւաքեն , կը ծախեն և կու տան որպէս զի դաստիարակութիւնը բարգաւաճի :

Իմ խօսիցս նպատակին մէջ մնալով այս միայն յիշատակեմ թէ մեր տալու դաստիարակութիւնն բոլորովին ազգային պիտի ըլլայ , ազգային ըստ լեզուին , ազգային ըստ նիւթոյն , ազգային ուսմունքն և ազգային ուսուցիչքն ալ : Որոնք որ ունկնդրացս մէջէն դաստիարակութեան ազնիւ

դբաղման կապեալ են , կամ թէ իրենց ընտանեաց և պաշտամանց առթիւ դաստիարակութեան խնդրոյն վրայ միտք յողնեցուցած , այնպիսիք պիտի գիտնան ինծի պէս , թէ ինչպէս կը բարախեն մանկական՝ պատանեկան և երիտասարդական սիրտեր , երբ ուսուցիչն բացատրէ իրենց՝ Հայազգի դիցազին մը քաջութիւնը և փառքը , կամ վատարազը մեր հայրենեաց թշուառ խեղճութիւնները : Անկեղծաբար խօսելով , իմ սիրտս անպատմելի մխիթարութիւն մը կ'զգայ , երբ մատաղերամ մանկուոյ հայրենական պատմութեան ուրախալից կամ տրտմալից դէպքերը աւանդած ատեն կը տեսնամ թէ ինդութիւնը և տխրութիւնը , աշխոյժը և թախիծը հետզհետէ անոնց կայտառ երեսաց վրայ կը դժագրուին : Հաւատացէք ինձ , ունկնդիրք իմ , թէ այն բնական և բնածին զգածումը մեծ յոյս կուտայ ինձ ապագային վրայ , գըրաւական է ինձ այն թէ բազմադարեան պանպուխտքս իսկ , որք հայրենի յիշատակները երկար ժամանակ մոռացութեան մէջ թողուցինք , և լեզունիս իսկ կորսնցնելու վտանգի մէջ ինկանք , հոգին չեմք կորսնցուցած : Հայութեան հոգին զըրաւոր հոգի է , սակաւ իսկ կրթութեամբ մեծամեծ արդիւնքներ կարող է արտադրել : Հայեր և Հայուհիներ , ծընողք և դաստիարակք , եթէ յուսացուցիչ է ձեր դիտակեան , ուրեմն աններելի էք եթէ Հայութեան հոգւոյն համեմատ չէք գործեր Հայ մանկութեան նկատմամբ :

Այսու հանդերձ պէտք է եւս խոստովանիլ , թէ արդի Հայութեան հոգւոյն մէջ մանրազննին խուզողութիւններ ընելով դժուար չէ տեսնալ վհատութեան երակներ՝ որ կամաց կամաց սարգած են մեր ազգին մէջ . և շատեր ալ աւելի առջեւ երթալով կատարելապէս կը յուսահատին և Հայութեան հոգւոյն վրայ տխուր տապանագիր մըն ալ կը դնեն . Ալ այդ ազգէն յոյս չկայ : Հայութեան հոգւոյն տկարութեան նշան մի է՝ արդեօք այդ վհատութեան խօսքը . ոչ երբէք , սիրելիք իմ , մանաւանդ թէ անոր զօրութեան նշան մի է . վասն զի նա որ այսպէս կը խօսի տխրութիւն մի կ'զգայ իր սրտին մէջ . և գող բռնադատեալ կ'արտասանէ այն ահագին

խօսքերը, ինչպէս զաւակ մը իւր սիրեցեալ մօրը մահուան անկողնոյն քով, անոր վրայ հողեվարքի նշանները տեսնալով, երեսը կը դարձնէ և մօտ կեցողին արտասուալից աչօք և սրտառուչ հեկեկամօք կ'ըսէ . Ա՛լ իւր կենաց յոյս չկայ : Արդեօք այդ զաւակը նուազ սէր ունի՞ իւր մօրը վրայ :

Ի՞նչ ըսեմք ուրեմն այդ վհատութեան նշաններուն և կիսահագագ բացատրութիւններուն վրայ . Իրաւ է՞ արդեօք որ Հայութեան հողւոյն վրայ յոյս մը դնելու չէ : Օ՛ն անդր, քա՛ն լիցի : Որ այսպէսն կը խօսին կրկին ծանրութեան տակ ճնշեալ կ'զգան իրենց դաղափարները . մէկ կողմէն մեր հէք հայրենեաց սրտակոտոր վիճակը, ուր ամենայն ինչ թշուառութիւն կը շնչէ և յողբս կը շարժէ . միւս կողմէն յառաջացեալ կամ յառաջադիմութեան ձեռք զարկած ազգերուն օրինակները, որոնք եթէ յաջողութեան կը հասնին՝ այնչափ և այնպիսի դիւրութեամբ և նպաստիւք զօրացեալ են, որ Հայ ազգութեան ոչ թէ ի մօտոյ ունենալն սյլ և ի հեռուստ ակնկալելն իսկ անհաւանական կը դատուի : Ինչչափ որ ես ալ այդ տեսութեանց ծանրութիւնը զգամ, — և եթէ անկեղծ խոստովանութիւն մըն ալ կ'ուզէք, ինչչափ որ ես ալ պահ մը այդ վհատեցուցիչ տեսութեանց առջեւ՝ տըխուր մտատանջութեանց մատնուած ըլլամ, — բայց հիմայ պիտի ըսեմ թէ Հայութեան հողին պէտք է այդ տարտամութիւնները ի բաց փարատէ . ինչ որ ալ ըլլայ անցեալը, որուն վրայ խօսիլն իսկ աւերորդ է, այսօր Հայութեան հողին իւր վրայ վստահելու չափ իրաւունք ունի :

Այ՛ ունի, վասն զի իւր ցարդ դիմանալը այնպիսի իմն անցեալ է, որ ապագայ վտանգին վախը կը փարատէ : Ունի՞ վասն զի ինչչափ ալ վարատական և դաղթական, ինչչափ ալ տկար և անզօր, բայց տակաւին վառ կը սրահէ աննկուն հողի մը : Ունի՞ վասն զի արդեան վիճակը նախկինէն տարբեր է, այսօրը երեկէն աղէկ, որով վաղիւն ալ այսօրէն ընտիր կը գուշակուի : Ունի՞ վասն զի իւր իրաւանց արծապանքը բարձրագոյն տեղեր ելաւ, և միջնազգային ատեաններու վճռով արդարացաւ : Ունի՞ վասն զի քաղաքական

հարկին բարձրագոյն օրէնքն իւր վիճակն ալ նկատեց, և անոր ալ իր պաշտպանութիւնը շնորհեց : Ունի՞ վասն զի ամեն տեղ Հայն սթափեցաւ, և եթէ միտքն դժուարանայ, սիրտն կը շարժի գործել և յուսալ : Ունի՞ վասն զի այսօր մեզմէ իւրաքանչիւրն ալ այդ ապահովութիւնը կ'զգայ . և ուր հասարակաց կարծիքը կը միանայ, անդ փիլիսոփայք աներկեւան ճշմարտութիւն կը հաստատեն : Վերը վհատեալ հողիները յիշեցի, ասոնք շատ էին, այսօր քիչցան, վասն զի առիթներն իսկ քիչցան . և մեք որ իմաստասիրելով այդ հետեւութեան հասանք՝ պարտաւոր եմք ընդհանրացնել այդ համըզումը, և բանիւ և գործով աշխատիլ որ Հայութեան հողին ամենուրեք և ամեն սրտի մէջ զգենու նոր աշխոյժ, նոր եռանդ և նոր գործունէութիւն :

Հայութեան հողւոյն մէջ ուրիշ թերութիւն մըն ալ կը նկատեն ոմանք, այն է դիւրաւ իւր ազգութեան անունն, լեզուն, սովորութիւնն և տարազն թողլով, օտարազգեաց նմանիլ, և փառք սեպել իսկ՝ երբ մէկը այնչափ կարենայ իւր անձնաւորութիւնը ծպտել և կեղծել, որ Եւրոպացոյ մը հետ շփոթուի : Այդ յանցանքի, կամ թէ կ'ուզէք յանցանք ալ չըսեմ, այդ թեթեւ բնաւորութեան տէր անձինք մերազնեկից մեջ եղած են, և կան իսկ . սակայն անխառ է ըսելն, եթէ այդպիսեաց ըրածը Հայութեան հողւոյն իբր կանոն մը պէտք է առնուլ : Ասոնք ո՛չ ազգին ընդհանրութիւնը կը կազմեն, և ո՛չ ալ ազգին մեծամասնութեան մէջ կը դըրսնուին : Այդ ընտղներէն շատերն ալ դիւրաւ չքմեղանք կը գտնան, որովհետեւ իրենց ուսումնական կրթութիւնը ազգին կեդրոնին մէջ չկարենալով գտնալ, օտար աշխարհաց մէջ պարտաւորութեան փնտռել, և օտար սովորութեանց ընտանեցան, իսկ ունակութեան զօրութիւնն ալ ոչ որ կըրնայ ուրանալ : Վարդ ժողովելու գացին, փուշն ալ մէկտեղ բերին : Իսկ անոնք որ հեռաւոր աշխարհներ գաղթելով՝ ժամանակով տեղացոյց հետ խառնուեցան և ոչնչացան, դրեթէ բնական հարկի մը զո՛հ եղած պէտք է ըսուին, և ոչ թէ հողւոյ տկարութեամբ յանցաւոր :

Գալով առջիններուն, մեր փոյթը պիտի ըլլայ ճանչնալ և ծանուցանել թէ այս չէ յառաջադիմութեան նշանը և արդիւնքը, և ջանալ որ անտեղութիւն մը՝ որ բարեբաղդաբար քիչերու մէջ պարփակեալ է՝ չընդարձակի: Եւ եթէ արմատաքի դարման մըն ալ կը փնտռուի, այն ալ առաջին անգամ զուրցածներնու հետ կը նոյնանայ. այն է փութալ ազգային դաստիարակութեամբ սնուցանել մեր պատանեակները, և անոնց երկրորդական և բարձրագոյն ուսումն ալ ազգայինի վերածելու աշխատիլ. ազգային մամուլը հարըստացընել. ազգային ընտիր և օգտակար լրագրաց ձեռօք հանապազօր ազգային ճաշակ տպաւորել երիտասարդութեան սրտին մէջ. մէկ խօսքով ինչ որ մտաց և սրտի յագուրդ է ի մասին ուսմանց և գիտելեաց՝ ազգային պարունակին մէջ լրացուցանել, որ իրաւամբ կարեւորն իսկ օտար պարունակաց մէջ փնտռելու չպարտաւորուին: Իրաւ որ առայժմ ուսումնական արուեստից համար համալսարաններ յաճախողներ դժուարաւ պիտի կարենան Հայկական համալսարան մը գտնալ. բայց միթէ հնար չէ՞ որ ազգին մեծամասնութիւնը՝ գոնէ ուսումնական անձ մը ըլլալու կարեւոր եղածը՝ իւր ազգին ծոցին մէջ լիովին և կատարելապէս ունենայ:

Եթէ ճշմարիտը խօսիլ ուզեմք, ազգին մեծամասնութիւնը և գրեթէ ընդհանրութիւնը՝ լիովին յարեալ է այն ամեն բանի որ իւրն է, և այդ յարումն եղած է իւր վրկութեան ալ գլխաւոր պատճառը. և յայսմ մասին աշխատութիւն մը պէտք չէ ազգը համոզելու: Թերեւս հակառակ այս բեղած բացառութեանց խօսքն իսկ ընել հարկ չէր, եթէ բովանդակ իմ նպատակիս հետ յարաբերութիւն ունեցող կետերը ամենայն ճշգրտութեամբ մէջ տեղ դնելու պարտքը չզգայի:

Ազգային կրթութիւն մը տալով, վհատութեան երկիւղը փարատելով, և օտարազգեաց նմանելու թեթեւութենէն փախչելով Հայութեան հոգին արծարծել, ահա ընելիքնիս. ասոր արդիւնքն են մէկ կողմէն Հայութեան հոգւոյն բնութիւնը հաստատել, միւս կողմէն սոյն հոգւոյն վրայ դրուած

արատները սրբել. մէկ կողմէն եղած ամբաստանութեանց արդարացուցումը տալ, միւս կողմէն ընկալեալ պակասութեանց դարմանները հոգալ. նախաբանիս մէջ տուած խոստմանս համեմատ տեսական խօսակցութիւններէ պիտի խորչէի, ահա խոստմանս կատարումը, ահա գործնական միջոցաց մեկնութիւնը. բայց դեռ ուրիշ ծանրակշիռ կետ մըն ալ կայ, այն ալ պէտք է մեկնել, թէպէտ աւարտելու ալ ատենը կը հասնի:

Բանախօսութեանս առաջին մասին մէջ բաւական բացատրեցի Հայութեան հոգւոյն բնածին յատկութիւններէն մին, որ էր արտակեղրոնական դրութեան ունեցած յարումը և անհատական յատկութեան և զօրութեանց ազատ ապարեզ պահանջելու միտումը: Որք Հայութեան ապագային կ'աշխատին՝ հարկ է որ միտքերնուն առջեւ ունենան թէ պարտաւոր են Հայութեան հոգւոյն համեմատ աշխատիլ: Շատ լաւ դրութիւններ, շատ ընտիր օրէնքներ, շատ օգտակար գործեր կը հաստատուին կամ կը կատարուին զանազան աշխարհաց և ազգաց մէջ. անտեղի է պնդելը թէ ի հարկէ անոնք մեր ազգին և մեր աշխարհին մէջ ալ, պէտք է նոյն կերպով գործադրել, և անկէց աներկբայ օգուտներ սպասել: Շատ իմաստուն մէկ մը ըլլալ հարկ չէ իմանալու կամ իմացընելու համար, թէ ընտիր օրէնքը բացարձակ բան մը չէ, այլ յարաբերական, և ինչ որ ոմանց համար օգտակար է այլոց համար վնասակար կրնայ ըլլալ: Սահմանադրական հոգւոյն վրայ իսկ խօսելով, որոյ օգտակարութիւնն այժմ ազգաց մեծագոյն մասէն ընկալեալ և գործադրեալ է, ոչ ապաքէն շատ մը իմաստուն քաղաքագէտք կ'ըսեն թէ այս կամ այն ազգին յարմար չէ, օգտակար չէ. ոչ ապաքէն սահմանադրութեան հաստատուելուն և արտակեղրոնական ոճոյն համար ժողովրդեան մէջ չափաւոր յառաջադիմութիւն և զարգացումն փնտռել սկզբունք եղած է:

Մեր ժողովրդեան յառաջադիմութեան ինչչափ ըլլալը չքննեմ, այլ յաւէտ ցուցնելէն ետքը թէ անոր համար արտակեղրոնական ոճն, բնական պիտոյք մի է, օրինաւոր կը սե

պեմ հետեւեցնելը թէ ուրեմն մեր ազգը յառաջագէմ և զարգացեալ ժողովուրդ մի է : Սակայն երկուք են զարգացմունք . մին որ բնական տաղանդոյն արդիւնքն է , և այս մեր ազգին մէջ կայ . իսկ միւսն ուսումնական դաստիարակութեան արդիւնք է , և անոր մէջ շատ պակասութիւններ ունիմք տակաւին : Ասոնցմէ առաջինն ալ բաւական է որ մեր ազգին զարգացեալ ժողովրդոց յարմար սեպուած վարչութեան և մատակարարութեան ոճը շնորհուի . և այն ամեն ազգայինք որք Հայութեան բարւոյն համար կ'աշխատին թո՛ղ սոյն կանոնաց հպատակին . և եթէ կ'ուզեն որ իրենց ջանքն արգասաբեր ըլլայ , թո՛ղ օտարոտի ճանքաներու չերթան , և եթէ կ'երթան , թո՛ղ չղարմանան երբ իրենց ջանքն վայրապար և անօգուտ կը մնան :

Սակայն լաւ իմացուին խօսքերս , և չըլլայ թէ ոմանք այլ ընդ այլոյ իմաստ մը տան անոնց : Որպէս զի ամեն սկըզբունք և ամեն կանոն իւր նպատակին հասնի , պէտք է յարգէ ծայրայեղութենէ փախչելու օրէնքը , և ոչ ոք պնդէ մէկ ծայրը՝ մոռնալով միւս ծայրը . այլ գիտնայ թէ ինչ որ առաքինութիւն է՝ միջին տեղին մնալ կը պարտաւորի : Ծայրայեղութիւն մի է եթէ ոք պնդէ և ըսէ . Որովհետեւ արտակերտնական ոճը աւելի յարմար դատուած է մեր ազգին վարչութեան և աւելի օգտակար անոր յառաջադիմութեան , անոր համար անհնար է բարեխառնել զայն արտաքոյ կարգի արամադրութեամբ մը արտաքոյ կարգի գործոց մէջ , և իսպառ հերքելի են ոմանց և սակաւուց գործերը՝ ևս և երբ անոնցմէ յայտնի օգուտներ կը տեսնուին : Բայց ծայրայեղութիւն է ևս թէ ուրիշ մը պնդէ և ըսէ . Որովհետեւ կան առիթներ որոց մէջ մէկի կամ սակաւուց գործը խորհրդապահութեան , գաղտնութեան , չուսութեան և պատեհութեան պարագայիւքն անմիջական օգուտներ կ'արտադրէ առանց երկար վիճից և քննութեանց ժամավաճառութեան , պէտք է ուրեմն միշտ այդ կերպով գործել , և հակառակ ճանքան խախտել , ջանալ իսկ որ ազգային ժողովրդական հոգին իւր ազդեցութիւնը կորսնցնէ :

Տո՛ւր ինձ խումբ մը մարդիկ որ առջի կարծիքը պաշտպանէ , ա՛ւր ևս խումբ մը որ երկրորդ կարծեաց ջատագովութիւնը ընէ , և ահա ընդունայն վէճեր և անմիաբանութեան աղբիւրներ : Իրաւ է որ պիտի չըսեմ թէ այդ երկու խումբ մարդիկ անմիաբանութեան հոգի ունին . բայց ի՞նչ օգուտ անոնց հոգւոյն այս կերպ ըլլալէն կամ չըլլալէն , եթէ փնտր նոյն կերպով մէջ տեղ կ'ելլէ : Ի՞նչ օգուտ , կը հարցնէի . . . բայց միտքս կուգայ թէ օգուտ մը ունի . և այս է թէ քանի որ իրենց հոգին ըրածներուն յարմար չէ , մեծ յոյս մի է որ իրաց վիճակը իմացած ատեննին՝ դիւրաւ պիտի թողուն իրենց պատահական սխալանքը և պիտի չափուեն ընդունայն տարաձայնութեանց վրայ : Մանաւանդ որ , Ունկիւղիքը իմ , ամենէն մեծ իմաստութիւն ժամանակը ճանչնալն է , առիթները կշռել , պարագայները կշռադատել , և իւրաքանչիւր օրուան և իւրաքանչիւր վայրկենին մէջ ինչ որ պէտք է զայն գործել , և ոչ թէ ինչ որ տեսականապէս ընտիր է՝ անոր հետեւիլ :

Կարեւոր ժամանակի մը մէջ եմք . առիթներն և պարագայներն զորս մեք ստեղծեցինք , կամ որք առանց մեր կամաց իսկ մէջ տեղ ելան , ծանրակշիռ են . և մեր ձեռքն է որ անոնք աւելի իսկ ծանրակշիռ ըլլան , քան թէ ինչ որ ենն : Դուք որ ազգին բաղդը ձեռուրնիդ ունիք , իշխանաւորք և պատուաւորք ազգիս , դուք որ ազգին կեդրոնը կը կազմէք , վարչութեան գլուխք և անդամք , դուք որ սրբազան երդմամբ և օրինական պարտաւորութեամբ ազգին բարութեան և յառաջադիմութեան պատասխանատուութիւնը ստանձնած էք , ձեզ ամենեցուն կը յանդգնիմ յիշեցուցանել . — թէպէտև խրատու ըլլալու իշխանութիւնը չունիմ , այլ կը խօսիմ այնու համարձակութեամբ զոր ճշմարտութիւնն իւր անքննելի զօրութեամբ կ'ազդէ ամեն խղճի և սրտի . — ձեզ ամենեցուն կը յանդգնիմ յիշեցուցանել , թէ կը սխալիք և մեծ յանցանք կը բարդէք ձեր գլուխը , եթէ կը մոռնայք ի նկատի առնուլ թէ ինչ է ժողովրդեան միտքը և կամքը . եթէ ազգային գործը ենթադրելով երբ ձեր մի-

այն գործ՝ դուրսէն եկած լուսերուն և խրատներուն յարգ-
չէք ընծայեր . եթէ անցնիւր գործունէութեան առջեւ ար-
գելքներ յարուցանելով, կարծես թէ ձեր միայն գործու-
նէութիւնը կ'ուզէք փայլեցնել . եթէ ուր օրինական կամ
խոհեմական կամ շահեկան ընթացից հարկը կը պահանջէ՝
որ հպատակին և ժողովրդեան ալ բաղձանքն յարգուի,
դուք ձեր իրաւանց սարաղէս պաշտպանութեանը հետա-
մուտ կ'ըլլաք :

Այլ և դուք ժողովուրդք և ժողովրդականք , դուք Հայեր
ամեն դասէ և կարգէ , եթէ կը բաղձայք խստապահանջ ըլլալ
ձեր իշխանութեանց հետ , աւելի խստապահանջ եղէք ձեզի
հետ : Եթէ պարտք մի կայ անոնց վրայ , կրկին պարտք մեր
վրայ կը ծանրանան . սէտք է ճանչնամք թէ ո՛չ միշտ իշխա-
նութիւնն կրնայ իւր ընթացից և գործոց սկիզբը և միջոցը և
նպատակը ակնյայտնի պարզաբանել , ո՛չ միշտ կրնայ իւր ջա-
տագովութիւնն իսկ կատարելապէս խօսիլ , ո՛չ միշտ կրնայ
իւր զգուշաւորութեանց կետերը ստորասաբար հաստատել .
ստէպ հասարակաց վստահութիւնն է որ իրեն զէն և զօ-
րավիգն կ'ըլլայ ի գործ , և պաշտպան գործէն ետքը : Երբոր
գժուարին են ժամանակք , օգտակար է իշխանութեան չորս
կողմը ամփոփուելով , մի և միացեալ միութիւն մը կազմել ,
և անով ամեն կերպ գժուարութեանց դէմ մաքաւիլ : Բա-
ւական վստահութեան հիմ մըն է , որ նա՝ որ ազգին բաղդին
վրայ կը յողմնի ժողովրդական քուէէն ընդունած է իւր պաշ-
տօնն , և ժողովրդական քուէէն կը վայելէ վստահութեան
յարատեւելը : Չսփազանց պահանջողութիւնն թէպէտ և չար
հոգի մը չէ , բայց բարի հոգւոյ զեղծումն ալ վնասակար է ,
և մեք մեր նախնեաց թշուառութենէն ուսեալ խրատուիմք
և զգաստանամք : Անոնց հոգին պաշտպանեցի իրաւ , բայց
միթէ հնար է սխալանքն ալ պաշտպանել :

Դուք Հայեր և Հայուհիներ , դուք որ ի բնէ անհատական
ձրից և կատարելութեանց պարծանքը ունիք , և անհատական
գործունէութեան համբաւով կը փառաւորուիք , ահա և ձեր
իւրաքանչիւրին առջեւ ընդարձակ ասպարէզ մը : Այդ գոր-

ծը որ ամենուս հաւասարապէս սիրելի և ամենուս ներքին
զգացմանց դիտակետն է , այդ գործը որ Հայութեան հոգ-
ւոյն վախճանն է , Հայութեան հոգւոյն ոճովն պիտի կատա-
րուի : Անշարժ միտք չգանուին , անզգայ սիրտք չտեսնուին ,
անգործ ձեռք չմնան . ամենայն ոք մտածէ , ամենայն ոք
փութայ , ամենայն ոք գործէ . իւրաքանչիւրնիս իւր կարո-
ղութեան համեմատը կատարէ , և եթէ հնար է կարողութենէ
աւելին ալ , վասն զի պէտքը միջոցներէն մեծագոյն է տա-
կաւին : Երկուքնիս երեքնիս միանալով կարողութիւննիս
չատցնեմք , այդ խմբեակներով ընկերութիւններ կազմեմք ,
այդ ընկերութիւններով հասարակութիւնք յառաջանան ,
այդ հասարակութեամբք ազգը միանայ և զօրանայ : Մեր
հոգւոյն համեմատ կը բաղձամք որ ամենքնիս ալ սեփական
գործ մը ունենամք , և ամեն գործոյն համար ըսուի թէ՛ Այս
ալ այս անուն անձին գործն է : Ի՞նչ ընեմք : Այդ ալ Հա-
յութեան հոգւոյն մէկ յատկութիւնն է , եթէ կ'ուզէք ըսեմ
եւս՝ թէ մէկ տկարութիւնն է : Բայց այդ տկարութեան ալ
աղէկ կողմը կայ . և իւրաքանչիւր ոք թող աշխատի որ ինքն
ալ աղէկ բան մը ըրած համարուի : Երբ գործողք կը շատ-
նան , արդիւնք ալ կը շատնան , օգուտներ ալ . միթէ ազգին
վնասակար է այդ :

Բայց կրնայ վնասակար ըլլալ՝ եթէ այդ բաժանեալ գործք
միութեան կետ մը չունենան , եթէ այդ շառաւիղք կեդրոնի
հետ միացած չըլլան , և դարձեալ՝ երբ այդ մասնական
գործք զիրար կործանելու աշխատին , կամ իրերաց գործու-
նէութեան ասպարէզը խափանեն : Եթէ երբէք այսպիսի ինչ
ընէ ոք՝ նա չարաչար կը մեղանչէ Հայութեան հոգւոյն դէմ ,
և նորա անունը Հայութեան դպրութենէն իսկ ջնջուելու է .
այլ երբ ընդհակառակն սուրբ նախանձով մը մին քան զմիւ-
սըն յառաջանալու կ'աշխատի , ինչո՞ւ վնասակար ըլլայ բա-
ժանաբար գործելը : Կան բաներ որ անբաժին են , և անոնց
մէջ միակութիւն հաստատելու է , ինչպէս հնար չէ երկու
կեդրոն հաստատել մէկ շրջանակին մէջ : Այս առթէն դուրս
թող զանազան մասունք մնան . թող զանազանութեան կե-

տեր իսկ մնան . մասանց իրարու խառնելը և ձուլելը չէ փնտռուածը , այլ մասանց իրարու կցելը : Մանաւանդ թէ Հայութեան հոգւոյն ազդեցութեան համեմատ այդ է միայն ապահով ուղին՝ որով մեք կրնամք յուսալ թէ մեր նպատակին պիտի հասնիմք : Ասոր համար ես երբէք չեմ մտածեր թէ ինչո՞ւ ընկերութիւնք մեր մէջ կը շատնան , և թէ ինչո՞ւ նորոգեալ և նորածնունդ ընկերութիւնք օր քան զօր կը յաճախեն . մտածելու տեղ կ'ըլլար եթէ այդ ընկերութիւնք սկսէին իրարու գործը խափանել կամ իրարու գործունէութեան ասպարէզը գրաւել . բայց ցորչափ մէկը վասպուրականին մէջը կ'աշխատի , միւսը ի Տուրուբերան , մէկը ի կիլիկիա , միւսը ի Փոքր Հայս , մէկը մէկալին նպատակից չլնասեր , և հանդանակութեանց արգելք չդնեն , կ'ուրախանամ իսկ որ գործողք կը շատնան այդ ընդարձակ դաշտին մէջ , ուր բազմաթիւ մշակաց պէտքը ամեն օր աւելի զգալի կ'ըլլայ : Ըստ այսմ ամեն Հայ սիրտ պէտք է խնդութեամբ ողջունէ այդ ազգասէր թաղին մէջ ծնունդ առած նորութիւն մը , Հայուհեաց Ազգանուէր ընկերութիւնը , որ ազգասէր և ազգանուէր տիկնայց և օրիորդաց ձեռնտուութիւնը և գործունէութիւնը և նպատար կը բերէ ազգային յառաջագիւմութեան գործոյն , և այնպիսի ձեւով և զգածմամբ՝ որք Հայութեան գեղեցիկ հոգւոյն արտայայտութիւնն են : Չեր գեղեցիկ հոգւոյն առջեւ , ազգանուէր Տիկնայք և Օրիորդք , պէտք է որ ամեն ազգասէր իւր զարմացման հարկը վճարէ , և անկեղծութեամբ կ'ըսեմ՝ թէ առանց սրտաշարժ զգացմանց չկրցայ ընթեռնուլ յայնկոյս վոսփօրի ձեր փափուկ և համեստափայլ ըզծից բացատրութիւնները , որոց ձեր խմբէն մին ի ձեր անուն թարգման ըլլալ յանձնառու եղած էր : Իցէ՞ թէ ձեր աղնիւ օրինակը ամեն թաղի և ամեն քաղաքի Հայուհեաց մէջ տարածուէր :

Իսկ ընկերութեանց գործոյն գալով , — որովհետեւ ամեն բանի մէջ չափ և կանոն կարեւոր է , — անոնց շատնալուն մէջ ալ օգտակար կ'ըլլայ հոգալ , որ բազմացներու փափաքը մանր և աննշանակ էակաց ստեղծման չժառայէ . և միւս

կողմէն լուեւայն կամ յայտնի միաբանութիւն մը զանազան ընկերութեանց գործերը բարեկարգէ : Ուրիշ աշխարհաց մէջ սովորութիւն է զանազան ընկերութեանց կեդրոնական համայնախումբ մը ունենալ , ամենուն գործը յարմար կերպով բաշխելու : Հնար չէ՞ արդեօք նոյնը մեր մէջն ալ գործադրել : Ազգային ընկերութեանց գործադիր ժողովոց մը տաղրութիւնը կը հրաւիրեմ այս կետին վրայ , մանաւանդ որ կերպը բոլորովին յարմար է Հայութեան հոգւոյն :

Կրցայ՞ արդեօք , Ունկնդիրք իմ , նպատակիս հասնիլ և Հայութեան հոգին ինչպէս որ պէտք է ձեր առջեւ ներկայ յայնել : Գիտեմ թէ շատ բաներ ալ եւս կրնայի զրուցել , մանաւանդ թէ զրուցածներս ալ մարթ էր աւելի պարզ և կարգադրեալ կերպով բացատրել . սակայն վերադասեցի որ խօսքերս զեղման սրտի արձագանք մը ըլլան , քան թէ արուեստակեալ ճարտարախօսութեան օրինակ մը : Երբոր բովանդակ իսկ աշխարհ իբրեւ կաթսայ յեռանդեան կը պըղպըջակէ , երբոր ազգք և ազինք իրենց ապագային խորհրդոփն կը տոչորին , երբոր ամեն կողմէն յուսոյ և ակնկալութեան ձայներ կը լսուին , երբոր մեր ազգն ալ այդ բարեգուշակ շարժման մասնակցելու կ'սկսի , ծանր էր ինձ տեսնել որ չարագուշակ մարգարէներ մտացածին կարծիքներով և ենթադրութիւններով ազգասիրաց եռանդը կը մարեն և աշխատողաց ձեռուրները կը թուլցնեն : Ամենէն ծանր էր Հայութեան հոգւոյն վրայ դրուած արատը , անմիաբանութեան տգեղ կնքով անոր ճակատը պըծելը , և այս պակասութենէն առաջ եկած ուրիշ հիմնական թերութիւնները ենթադրել , որով անհնար կ'ըլլար բոլորովին Հայ ազգութենէն բարի ապագայ մը սպասել . ծանր էր ինձ կ'ըսեմ լսել այս ամեն եղբրական ձայները , ուստի անոնց հակառակ խօսիլ ուզեցի , որպէս զի ցուցնեմ թէ ո՞րն է բուն իսկութիւնը , ո՞րն է պատահական պակասութիւնը . ի՞նչ է անոնց պատճառը , և ի՞նչ դարձեալ գործածուելու դարմանը : Ինչ որ ցարդ խօսեցայ բաւական ըլլայ . ուրիշներու կը թողում աւելի խոհական և աւելի կատարեալ գործը :

Երբոր Հայաստանի տարաբաղդ վիճակը կը քննեմ, երբոր իր վրայ տիրող ազդեցութեանց ներգործութիւնը կը չափեմ, երբոր եղկելի Հայոց գտնուած վիճակին շփոթութիւնները կը տեսնեմ, երբոր մեր Հայրենեաց կատարեալ կործանմանէ հրաշալի ազատութիւնը կը նկատեմ, և միանգամայն կը լսեմ որ ոմանք զարմացմամբ առջեւ կը դնեն Հայոց միաբանութեան և արիութեան մասին ըրած պակասութիւնները, և գորովանաց և դատապարտութեան խօսքեր կ'աւելցնեն այն խեղճերուն դէմ, անկեղծաբար ըսեմ, ես կը զարմանամ յաւէտ թէ ինչպէս կրցեր են այնչափ միաբանութեան և արիութեան գործեր կատարել՝ որչափ ինչ պատմութիւնք և յիշատակք մեզ հասուցած են, և թէ ինչպէս կրցած են պահել իրենց ազգութեան արդեան վիճակը, այն վիճակը՝ որ ոմանց աչքին այդչափ յետնեալ և ոչինչ կը տեսնուի :

Այդ ամենայն միութեան և հաստատութեան արդիւնք է, Սիրելիք իմ, այն միութեան որով համազգիք եղբարք են իրերաց, եղբարք ի Հայկ և յԱրամ, եղբարք ի Գրիգորեանս և ի Ներսիսեանս : Այդ եղբայրութեան հոգին խորարմատ տպաւորեալ ունի Հայն իւր սրտին մէջ, և նոյն կը հնչէ իւր շրթանց վրայ, վասն զի յաւելուածոց սրտի խօսի բերան : Մինչ ուրիշ ազգերու մէջ՝ ընկեր առ ընկեր տիրջ անուն կ'ընծայէ, Հայաստանցին կը սիրէ իւր համազգին եղբայր անուանել : Շատ աւելի անուշ և քնքուշ է ազգասիրաց ականջներուն Հայաստանի ռամկին Ա.ԽՊԱ.Ր ը, քան թէ թրքախօս կամ պարսկախօս կամ գաղղիախօս հնչմամբ՝ համազգի առ համազգի տիրական անուանակոչում տալը : Մեր ըրածը չէ Հայութեան հոգւոյն հաւատարիմ թարգմանը, այլ անոնց սովորութիւնը՝ որք հայրենական հոյոյն վրայ ծնած և սնած, և տառապանաց բեռամբ իսկ ճնշեալ, հայրենական նշխարաց հաւատարիմ պահապան՝ և հայրենական աւանդութեանց աւանդապահ են մնացած : Այդ աւանդութիւնն է թարգման Հայութեան հոգւոյն յոր կը պարծիմք, և որով պէտք է որ վարուիմք ամենքնիս, ոչ թէ

շրթամբ այլ և գործով եղբայր անունը տալով իրերաց, վասն զի

Ընդ աստեղօք ի՞նչ կայ սիրուն,
Քան զանձկալի ԵՂՔԱՅԻ անուն :

Խորհրդաւոր յիշատակ մը ի դէպ կու գայ, եղբարք իմ, որ Հայութեան հոգւոյն և ազգային եղբայրակցութեան յիշատակը փառաւորեմք : Յեռանդն լրացաւ Ազգային Սահմանադրութեան իննևտասներորդ տարեդարձը, և վաղիւ կը պատրաստին ազգայինք տօնախմբել զայն ազգային շքը ջափակի մէջ. այն Սահմանադրութիւնը որ Հայութեան հոգւոյն հետեւութիւնն է, և որով Հայութեան հոգին իւր օրինաւոր բացատրութիւնը ստացաւ : Տօնեցէք զայն և տօնախմբեցէք, եղբարք իմ, վասն զի այնու Հայութեան հոգին կը տօնախմբէք. այլ միայն յուշ լիցի ձեզ, թէ սահմանադրութիւն սահման կը դնէ, և ամենայն ինչ որ բարի է և օգտակար, դրուած սահմանաց մէջ պիտի շարժի : Բարի է Հայութեան հոգին, այլ երբ վերոյիշատակեալ սահմանաց կանոններովն գործէ :





Գին 3 զուրուշ արծաթի դրամ:

« Ազգային գրադարան



NL0201570

